

湖海樓詞集

冊四



湖海樓詞集卷十七

宜興陳維崧其年著

和州戴本孝務旃

涇陽任璣詠庵

宛平米漢雯紫來選

崑山葉一鵬萬九

三姝媚

寄遠用梅溪詞韻

弟 維岳緯雲

宗石子萬

男履端

姪賜薛校

參閱

柳線吹碧瓦記纔傾別酒泪同鉛灑低拍蕭娘等吳  
 楓紅了再來簾下詎料而今折挫煞游梁司馬辜負  
 伊家蟾上瓊簪麝湮綃袂况是關河旅夜數長短  
 更聲甚時方罷斜壓紅裯曾化為蝴蝶此歡無價恰  
 又平明好夢與釭花都謝擬倩錦箋論恨慼慼難寫  
 紀半塘所見同緯雲弟次山姪用湘瑟詞韻  
 重來偏寂寂算疎闌輕塵粉纖曾拭兩兩雛鬟記苦  
 衫小露水邊門側弄影凝粧誰耐理綉床刀尺閒盼  
 山塘細犢金輿往來得得再向橋陰繫席只半艇

烟昏千簷雨滴此際蘭閨定雙擁金鳧換吹鈿笛眼  
底吳娃枉自詡嬌紅膩白其奈又經過處斷無消息

萬年懽

贈宋子猶先生七十次朱致一原韻

碧海青天歎橫江下瀨樓櫓非昨日貝闕龍堂彈指緇  
宮乾却槍臥綠沉休拓任半世鳳飄鸞泊閒排纂世  
史長編朱黃細界疆索 菰蘆景略誰知向窗前諷  
咀肆上丸藥老興淋漓一笑人間輕薄身亦北山猿  
鶴只一語臨風相託囑渭水好把綸竿藏舟且付春  
壑

壽毛卓人

猿鶴相聞說先生今歲正滿花甲又值秋晴門外金  
風颯颯鶴背朝元薄醉笑人世滄桑一霎游仙倦暫  
溷紅塵何妨傭保相雜 當初竹林贈答記分攜阮  
屐爭荷伶鍾詎料栖烏別後繞枝三匝誰識開元舊  
事只除是碧簫紅蠟君須醉莫負黃花糟床琥珀新  
壓

解語花

詠美人捧茶和王元美韻

蕃馬屏風雛鶯庭院竹下茶聲細粧樓小倚闌干外  
汲取春流淺試乳花銀蕊烟裊上綠鬟千縷溜橫波  
鑪火初紅儘帶嬌憨意捧處輕搖蟬髻問阿誰年  
少消受纖指珠鮮玉脆語笑處故惹檀郎驚起沉香  
亭婢只領略凝酥佳麗怎如伊生小江南偏解旗槍  
味

詠美人捧觴和王元美韻

楚天卯色吳地鶯聲惹得愁千斛春衣慢贖且泥他  
粉白斟來蟻綠蓮鈎小蹙行過了銀屏六曲驪烟鬢  
縹色杯輕帳裏圍頽玉笑顫流蘇影簇怪佯醒不  
醒罰依金谷玉郎低囑沉醉也休作難人題目芳心  
暗逐羨杯底鴛鴦同宿趁花酣雙抱紅篝圖取春眠  
足

吳靜安姑丈堂中閩蘭盛開約同人過賞時  
有二校書在座

玉堂窈窕珍簾虛無細壓真珠榨蘿陰石罅隨風皺  
一帶迴廊曲榭暗中香瀉列翠盎輕扶紅架羨高情  
楚畹湘潭助幽人消夏 萬朵珠承雪亞更花邊淺  
立人比姑射鬢蟬低卸微嗅處不數海天冰麝裏來  
盈把總罨住竹房茶舍倩繁絃併鼓猗蘭將晚涼亂  
惹

鳴高弟昔年曾與一年少為狎游昨偶遇市  
上而此年少已不復相識歸而悵然因記  
昔年都下緯雲弟曾宿一北里某家明日  
拉余暨魯望跡之而此伎驚問誰何亦漫  
不相記憶與此事絕相類因作此詞用調  
鳴高他日緯雲見此定復一軒渠也

柳花似夢鶯語初圓人遇章臺下舊愁縈惹記曾與  
宛轉風軒水榭金丸拋灑佯不認隔年司馬恨無情  
惆悵歸來擬碎揉花打 因記杜陵元夜有春衣醉  
宿肌沾冰麝重來繫馬誰提起昨夜月中私話揚州  
夢假煩寄語嬉游小謝任盈盈露井倡桃向粉箋休

寫

渡江雲

江南憶同雲臣和蘧庵先生韻

江豚翻碧浪憑高極望折戟半沉沙鷄籠山下路記  
得鳳城數十萬人家貂蟬掩映鐘山翠疊鼓鳴笳更  
參差青溪紅板從古說繁華堪嗟齊臺梁苑殘月  
微風剩頽墻敗瓦祇蒼涼半林楓櫺四壁龍蛇幾番  
夜向寒潮泊空城下浪打蒹葭青衫濕隔船同訴天  
涯

揚州感舊追悼西樵荔裳伯籲介夫諸先生

并懷阮亭約人穆情定九舟次無言諸公

揚州何限好無情江水送去渺天涯風流推宋玉更  
有烏衣門第舊瑯琊珠簾壁月賓徒盛多少繁華記  
當年水樓烟郭滿地采蓮娃傷嗟一城畫鼓兩岸  
紅燈共萬家鴛瓦都付與風彫菰米浪打蘋花牧之  
已老青樓換重經過帽側簷斜風定處隔江隱隱琵琶

送葉道子之任臨清守府

一鞭飛錦繖鳳城南去紅杏着花初建牙男子事千  
騎東方送爾上頭居碧油幢捲碾輕車小獵平蕪風  
流甚茸茸綠草淺映綉螿弧 愁予庾郎善賦江令  
工文任憑陵今古總輸與軍中陶侃江上周瑜何時  
玉鞞元戎隊劈黃獐爛醉醅酥毛錐子問伊直一錢  
無

送蔣京少下第游楚次儲廣期原韻

向長安市上仰天長嘯悔殺彩爲毫月明無賴極又  
炤征南萬將赤霜袍掉頭仍向瀟湘去去採離騷算  
襄樊幾般往事一半屬孫曹 舟搖天低滴黛竹瘦  
凝斑任崖傾峽倒恨茫茫一軍鐵甲九派銀濤潯陽  
夜火黃州雪應爲我徙倚無聊吾衰矣漫勞送上雲  
霄

欲雪

碧翁將試手趁春未到要放一城花關河都凍紫風  
慘雲昏冷色走龍沙籠窗撥火料寒威來早還加簾

櫳外未曾飄瞥吟興已無涯 山家當年此日枯柳  
疎鴉小柴門入畫恰又是梅邊渡暝鴈底航斜玉塵  
休擬廉纖舞念有人新在京華凝盼處預愁綠蟻難  
賒

絳都春

乙巳元夜

春宵三五正碧雲合處冰輪斜挂暗省年光漫數韶  
華偏沾惹平生舊事都忘也難忘是鳳城鴛瓦無燈  
無火有花有月偶然吟寫 此夜追歡買笑有天街  
似水暗塵隨馬詎料而今幾陣東風譙樓下吹去了  
香車羅帕春衣卸思量如乍且尋故老開元月明閒  
話

念奴嬌

雲間陳徵君有題余家遠閣一闕秋日登樓  
不勝蔓草零烟之感因倚聲和之

得憐堂後有丹樓飛起當年爭羨陽夏門庭能詠絮  
那更溪山葱蒨帶雨房櫳和烟簾幙零亂東湖面碧



闌干裏有人斜映瓊扇 可惜人去匆匆而今樓下  
秋水帆如箭老我三吳好男子綠鬢忽然衰賤蔓草  
霜濃叢祠露悄白晝鼯鼯現舍南舍北亂飛王謝家  
燕

附錄眉公先生原詞

陳定生建遠閣以娛 宮保公寄此題之

白頭宮保學東坡老子盤桓陽羨登閣攜兒同眺  
遠點點峯巒葱蒨玉女烟橫銅官雪霽濃淡開生  
面誰拈畫筆荆溪圖在紈扇 歎息周處英雄斬  
蛟射虎背劍腰弓箭俠氣干霄人不見變作椎埋  
下賤雨驟風儻狂霾休歇畢竟青天現闌干倚遍  
雕梁閒話雙燕

與任青際飲

乾坤颯颯且沽將楓葉細評今昔笑問幽州今夜雪  
可似鸛裘寒色市上吹簫橋頭賣醬淚灑吳楓赤蘇  
貂空黑謝郎今已破賊 不如冶葉倡條青樓白社  
磨滅人年月瀝盡并刀悲壯血看有何人憐惜白草

關河黃沙唐宋只對孤鴻說醉澆三國周郎江岸千尺

題顧螺舟小影

如此佳人是王家養炬謝家渴末三世貂蟬連北闕  
年少東華釋褐傅粉宮前薰香殿側顧盼真英發臨  
春結綺舊游似有瓜葛而今零落堪憐文園多病  
贏得相如渴滿目關河愁恨極衰草濃烟塗抹醉矣  
堪呵灰兮可溺田也供人奪芒芒哀樂四條絃子空  
撥

緯雲第三十作此詞因和其韻同半雪賦

醉拍闌干歎去者苦多光陰倏忽知我平生悲憤事  
惟有當頭明月准擬騎鯨不然射虎一吐胸中鬱吳  
鉤負汝好將衫袖頻拂追想紅燭呼盧青樓賭酒  
往事推華閨小季已稱三十歲何況暮年黃歇斜閣  
秦箏橫攤越絕燒盡爐中拙憑高遠望江流一綫如  
髮

送子萬弟攜五弟之睢陽并令二弟三弟四

弟同和他日一展齊紈便成聚首也

悲哉秋也况登山臨水黯然欲別千里長江流夜月  
萬里長城空闕白板船開青楓樹老極目徒悲切君  
歸梁苑漢家何限陵闕一疇昔讓棗推梨謝家兄弟  
才氣人爭說一夜西風吹蒼莽吹散封胡遏末兄作  
楚囚弟成秦贅枕上鶻啼血阿龍超甚教他長誦明  
發阿龍五弟小名時同四弟在睢陽

附和韻

維嶠

故園兄弟正秋冬之際殊難爲別幾陣西風吹鴈  
冷日暮雲連天闕此去平臺夢回水榭相憶情空  
切離筵宴罷舉頭霜月初缺最憐早歲親亡零  
丁孤苦堪與何人說潦倒一編予漸老悵望同枝  
天末客舍如家家鄉如客淚也都成血囑渠自愛  
榜師無奈催發

維岳

溪臨罨畫奈聚首幾時又成離別迢遞他鄉千里  
路縱有音書遼闊白鴈黃花纔過重九對景增淒

切參差雲樹望中誰是伊闕 最是第北兄南匆  
匆判袂辛苦如何說笑指阿龍年最小此是吾家  
謝未誨育成入莫耽嬉戲不負駒名血乾坤蒼莽  
慎旃車揭風發

宗石

蓼莪罷詠歎兄南弟北頓成離別一夜西風驅斷  
鴈月冷後湖空闊千里睢陽三更梁苑夢裏思鄉  
切悲來欲語口中無限啣闕 幸喜故國重來對  
床風雨細把離情說毀卵破巢多少恨贏得孤身  
天末倏忽春深無端秋盡看盡楓成血扁舟江上  
可憐明又將發

龍眠公坐上看諸客大合樂記丁酉中秋曾  
於合肥公青谿宅見此今又將十年矣援  
筆填詞呈龍眠公并示樓岡太史邵村侍  
御與三孝廉

醉來闌入正司空筵上一羣腰鼓老子婆娑牀上坐  
矍鑠聽歌似虎一片西風千堆畫燭月好青輝苦回

頭往事青溪舊夢重作 謝公笑問兒郎此間何處  
略記隋堤路老矣廉頗猶健飯莫負紅幺翠羽人在  
當場曲逢入破白髮休予侮新磨幡綽世惟公等堪  
語

次夜韓樓燈火甚盛仍聽諸君絃管復填一

闋

紅燭如山請四筵滿座聽儂搥鼓此日天涯謀作達  
事更難于縛虎僕本恨人公皆健卒不醉卿何苦金  
元院本月明今夜重作 總是狎客南朝佳人北里  
占斷蕪城路好景也知容易散一別沉鱗羈羽狂受  
人憎醉供人罵老任雛姬侮揚州燈火明朝人定傳  
語

乙巳中秋用東坡韻寄廣陵諸舊游

月明如此問江山今古幾多陳迹誰把桂輪今夜裏  
碾破楚天新碧玉白無聲銀河有影一片清虛國醉  
餘莫笑舊游吾尚歷歷 記得杜牧司勳江湖落拓  
曾作揚州客愛殺打頭天上月管甚中秋七夕一別

淒然吾生可惜塌盡鷗鵬翼夜二云深矣依稀樓外吹  
笛

酬歸德侯仲衡

天陰歲暮正情如中酒人初賦別忽接繁臺書一紙  
飛下梁園白雪悼遠傷離撫今追昔字字皆辛切狂  
歌數闋唾壺之口都缺 每欲窄袖輕衫礪傲道上  
小犯寒風冽耳後弓弦聲霹靂一片風毛雨血雅願  
終違壯遊未果世事多枝節中宵輾轉布衾今夜難  
熱

尤展成招飲草堂同丁飛濤彭雲客宋旣庭

御之卽席分賦同用飛濤韻

別來何久喜今朝坐上五君二仲時坐客共七人齊  
作鎮西鸚鵡舞舞罷持杯高詠蹴踏齊梁憑陵晉魏  
白眼看唐宋醅雖生肉公然意氣豪縱 最是月落  
參橫主人留客不放歸鞭控能得幾場花下醉况是  
吳宮如夢錦瑟憐誰青萍負我快作臨風弄唾壺缺  
盡狂歌亂擊春甕

詠玫瑰花

陡驚春去算風光此際又逢櫻笋拂曉謝娘簾閣畔  
忽逗賣花聲韻籃底氤氳頭狼籍紫艷香噴佳人  
競撚看來和露尤俊最愛別樣心情天然梳掠  
偏厭紅英襯揉得花魂魂盡碎另作一番安頓焙入  
衾窩薰歸裙縫細細調紅粉玉郎不覺錯疑戴向雲  
鬢

八月初七夜對月呈李湘北太史

帝城今夜正萬家齊看一鈎新月炤過龍樓和鳳苑  
來照盈顛華髮冷露初零清輝未滿玉宇都清切六  
街香霧也知絲管難歇最是太液詞臣金閨才子  
對景偏軒豁退直玉鞭搖闕下鴛瓦一時堆雪白可  
騎鯨廣能射虎醉擊珊瑚折料應相念有人孤館愁  
絕

初八夜對月飲紀伯紫處士寓

揮杯一笑恰舉頭又見昨宵明月如此清光兼老伴  
遺恨真無毫髮蓮子輕拋蘋婆細劈慢取橙齏切風

前倚幌滿城曉角初歇 可惜萬事蹉跎半生偏側  
難得胸懷豁誰把銀河墜下瀉快作西山積雪感極  
關河愁深砧杵一寸心俱折爲渾脫舞乃公直是奇  
絕

初九夜對月飲吳默巖太史寓齋

中宵狂叫憶曹公有語明明如月更記謫仙當日句  
明鏡三千白髮入洛年非游燕才盡幸舍歌辛切空  
墻老驥歎霜猛氣難歇 詎料宣武門前長椿寺側  
竟見秋堂豁更借一尊桑落酒光汎素莖飄雪一片  
鄉心三更鴈叫拚把刀環折角鷹刷羽脫鞵固是橫  
絕

初十夜對月同山右吳天章中州彭中郎吳

門周子倣章素文飲汪鈍庵戶部寓廬

虎丘石上記曾經看過幾場秋月錦隊花城渾不夜  
一縷歌喉如髮此際他鄉故人對酒一倍關情切爲  
歡休晚中原軍鼓初歇 漸覺帝闕寒生天街露悄  
醉把雙眸豁地界袁曹多戰鬼危語頭鬚成雪上句



彭中郎詩蕭瑟西風淒涼北里鴈柱箏都折霜螯飽  
噉不知前路愁絕

十一夜黑窰廠對月龔芝麓先生招陪諸公  
送董玉虬侍御之任秦中

董公健者到秦川正看秦時明月立馬灞陵橋上望  
極目應添白髮馳道雲埋重關日落金鐵爭摩切慷  
慨懷古西風颯颯難歇今夜客錢青門馬嘶珠絡  
好遣離愁豁高處憑闌飛火樹光映鳳城如雪暫領  
河湟旋朝京闕丹檻看重折木皮嶺上鴈書休使稀  
絕

十二夜對月戲柬劉公戡吏部時吏部新納  
姬

今宵閒想問誰家畫閣一雙人月細把朝衫薰苴蔻  
徐綰八盤玄髮人有琴心家居穎尾風調偏親切紅  
窗爾汝夜闌一倍難歇為語十二樓中金風初厲  
莫任瓊屏豁遙憶掃眉驅使處茉莉萬枝香雪天與  
貂蟬地多金粉笑揀名花折獨憐銀漢有人擣藥愁

絕時公戲舊姬方臥疾

十三夜大宗伯王敬哉先生招飲是夜無月  
先生語我正一生消受帝城烟月紅燭短時橫笛噉  
夜雨開元白髮霜咽遺弓風淒內苑畫角聲酸切先  
生時述世祖遺事銅盤承露淚如鉛水不歇 曾記  
樗杜笙簫長楊刀箭從獵霜林豁父子一時連上相  
印紐銀螭臥雪別墅初成淮淝已捷屐齒何曾折談  
深酒冷蓼蓼街鼓將絕

十四夜對月同王阮亭員外

三更以後碧天剛碾上一輪圓月嬌女故園應學母  
宛轉畫眉梳髮古巷蛩吟小窗鴈語觸景成悲切南  
飛烏鵲繞枝何處棲歇 我欲吹裂玉簫拓殘金戟  
小把愁腸豁生不神仙兼將相負此秋光堆雪燈下  
吳鉤腰間寶玦拉雜都摧折明當竟去終南聞道奇  
絕

十五夜宋蓼天太史招飲以雨不克赴少頃  
月出同緯雲魯望兩弟暨曼殊小飲寺寓

吾生萬事沉思遍都似今宵之月只到圓時期便左  
揉得愁成亂髮此夜西園故人東閣遲我情偏切衝  
泥無計車輪腹轉難歇 少頃皓魄東升海天一碧  
世界都軒豁燕市且須謀一醉難得銅街發雪絲竹  
顛狂弟兄歌叱碎拗金鞭折知他何處笛聲縷縷淒  
絕

十六夜對月呈孫北海先生

浩歌被酒喜舉頭仍見昨宵圓月遙憶高齋歌猛虎  
劍氣綠人毛髮老子龍頭細書蠶尾玉試昆吾切隗  
囂舊物土花千載難歇 更有粉壁波濤牙籤蝌蚪  
攤几供披豁吟健左車能決肉日榻黃州快雪餘子  
紛綸是翁矍鑠有角真堪折南樓高興依稀清嘯將  
絕

看山如讀畫讀畫似看山爲周樂園先生賦

用曹顧庵韻

青天粉本是五丁所鑿自然圖畫我識天公矜慎極  
吮筆幾曾輕下晴際添螺昏時使墨茜向朝霞借烟

絲雨髮直教染岱烘華 我欲地縮千山袖攜五岳  
點綴閒亭榭一幅橫披供眺望便可於中耕稼非畫  
非山是看是讀饒舌都教罷一身冷翠此間三伏無  
夏看山如讀畫

平生癖愛是荆關老手最紛披處狂叫墨花都發響  
認作畫師奇句比以漢書掛來牛角讀入前村去千  
迴不厭直疑聲振毫素 回想老子籃輿好天筍屐  
曾到層山路今日明窗懸幅幅一樣晴鬢堪數峽角  
將崩雲根欲活丘壑胸中具更憐着色崖邊碎點紅  
樹讀畫似看山

鉅鹿道中作

雄關上郡看城根削鐵土花埋鏃十月悲風如箭叫  
此地曾稱鉅鹿白浪轟厖黃沙蒼莽霜蝕田夫屋車  
中新婦任嘲醜裏生肉 太息張耳陳餘當年刎頸  
末路相傾覆長笑何須論舊事泚水依然微綠欲倩  
燕姬低彈趙瑟一醉生平足井陘日暮亂鴉啼入枯  
木

鄴中懷古

滏陽南去望鄴城一帶逼人愁思記得羣雄爭割據  
健者曹家吉利公子綵毫佳人繡瓦快意當如是漳  
河嗚咽至今猶染紅淚 猶憶秋夏讀書春冬射獵  
泥水譙南地轉眼寒烟縈戰壘耿耿還留霸氣賀六  
渾來韓擒虎去苑樹都如薺論人成敗世間何限餘  
子

題季端木小影

丹青一幅是西湖好手戴蒼之筆年少者誰真秀絕  
不讓王家摩詰話綉虎清才食牛奇氣刷羽霜空失科  
頭箕踞襟情一往蕭瑟 寄語莫賭羅囊人身似爾  
頭地終須出安得畫師乘快墨并寫驕騮十匹歷塊  
過都莖燕秣越此事爲君必若翁大笑看君長繞吟  
膝

紅橋園亭讌集限韻時有魚校書在座

霜紅露白借城南佳處一餐秋菊更值羣公聯袂到  
夾巷雕鞍綉軸一抹紅霞三分明月此景揚州獨揮

杯自笑吾生長是碌碌 且喜絕代娥媞玄機娣姒  
風致偏妍淑惱亂雲鬟多刺史何況閒愁似僕小逗  
琴心輕翻簾額一任顛毛禿倚闌吟眺雲鱗墳起如  
屋

讀顧庵先生新詞兼酬贈什卽次原韻

老顛欲裂看盤空硬句蒼然十幅誰拍袁絢鐵綽板  
洗淨琵琶場屋擊物無聲殺人如草筆掃魏毫禿較  
量詞品稼軒白石山谷 記得戲馬長楊割鮮下杜  
天笑溫堪掬玉靴角弓雲外響捎動離宮花木銀海  
鳥飛銅池鯨舞月照孤臣獨江潭遺老一聲寒噴霜  
竹

送朱近修還海昌并懷丁飛濤之白下宋旣

庭返吳門仍用顧庵韻

住爲佳耳問先生何事急裝趨肅曾在竹西園子裏  
狼籍釵徵釧逐別酒紅擎離帆綠飽人上蘭舟宿君  
行烟裏吳山螺髻新沐 可惜世事匆匆陡然方寸  
起岡巒陵麓誰倩石尤吹鷁轉并轉丁儀宋玉無數

狂奴一羣蕩子屯守娼家屋此情莫遂悄然熟視楓菊

被酒呈荔裳顧庵西樵三公并示豹人孝威  
梅岑舟次方鄴希韓女受散木諸子仍用

原韻

僕何爲者是東吳愁客最能擊筑記得阿奴年少日  
曾直高人品目甚矣吾衰時乎不再二語那堪讀朱  
門列戟此中何限梁肉 幸遇袞袞羣公憐而召我  
共看東籬菊我意亦思歸去耳聊葺溪干破屋行乞  
歌場爲傭屠肆也覓三餐粥安能豁刻矯廉長效孤  
竹

紅橋倡和集成索李研齋序孫介夫記作詞  
奉柬并呈冒巢民先生仍用顧庵韻

夔門蜀棧是史家粉本先生所獨更有孫樵雄且健  
暗裏漢書能覆二老縱橫兩篇記序並逐中原鹿古  
文奇字他人恐不能讀 直可抵突曾王激昂韓柳  
揖歐陽永叔我與浯溪曾有約采入文抄篇幅細寫

千行高吟百遍音響崩崖屋遇當佳處澆之苦茗芳菊

贈阿秀并呈西樵

晚風迴處忽簾開影露髻烟微綠驀地見人猶掩斂  
裙與闌干爭曲縈損紅巾撥殘錦瑟頓惹愁千斛客  
來休入請看門外金犢漸覺殘內鱗斂篝邊鴨瘦  
觥事卿須錄生世諧逢王吏部繡佛還工惜玉愛爾  
嬌憨嗔人拘管接碎釵兒菊晚攜素手碧天雨過初  
沐

曹顧庵王西樵鄧孝威沈方艸汪舟次季希

韓李雲田兄散木皆有送予歸陽羨詞作

此留別

此諸公者乃狂歌未已離歌又促僕本恨人臣已老  
怕聽將歸絲竹捩柁秋空發船月夜濁浪堆銀屋我  
行去作荆南山下樵牧被酒膝席相呼人生長聚  
那得同麋鹿歡伯却輸愁鬼厚只是與人追逐天若  
有情地如埋恨此會何難續他時念我杜陵男子蕭



育

送沈方鄴還宣城兼懷唐耕隲施愚山梅子

長同西樵用孝威韻

歸兮何暮歎風塵經歲迷陽却曲憶我同君為狎讌  
 夜夜彈絲吹竹弟畜余顛人呼沈瘦側帽談公毅方  
 鄴美須顛業春秋人身似此安能仰面看屋 故里  
 才子都官舍人唐老英妙兼耆宿更有肩吾能愛我  
 客舍綈袍情篤歸見二君雪深一尺定理尋詩躅尺  
 書好寄江船不乏千斛

延令季滄葦席上送周子做計偕京師

長途迫歲正黃河飛雪馬都沒腹袴縛黃皮雄舞稍  
 那顧從奴蝟縮斫彘屠門射雕塞上生啖黃獐肉看  
 君意氣真成勇過賁育 况是歷落盤龍風流公瑾  
 海內標名目此去長安聲價重定壓庾徐潘陸愧我  
 牢騷借人杯炙送汝登華軸慈恩題罷歸鞭春晝須  
 速

廣陵客夜却憶吳門同吳梅村先生暨葉訥

庵盛珍示王維夏崔不雕李西淵范龍仙  
王升吉飲錢宮聲宅時有新凰賴鳳二校  
書在座

月之十八記諸公共飲錢郎書屋祭酒能爲解散髻  
下語千人都伏東觀名卿南朝才子爭舉觴相屬莫  
愁更鼓任他燒短紅燭 何意尊合杯闌一雙么鳳  
齊注橫波目假使客中皆此夜詎羨八州之督上客  
如風佳人似雨薄命余同鞠鞠兮惜汝一生長被人  
蹴

季滄葦宅夜看歌姬演劇卽席成詞并示張  
天任因元五丹九儀戴弘度季孚公希韓  
咸季李三友朱石鐘諸子

吾生詎料也曾經親聽諸姨法曲非月非烟非霧雨  
非肉非絲非竹不易描摹最難忘記耿耿縈心目依  
稀梁畔暗塵飛墮千斛 昨者我渡江來正沙深月  
冷浪花堆簇飢蜃饒蛟渾不怕我有聽歌奇福拍到  
殘時人將散處樂往傷幽獨重逢難必岸巾且吸船

玉

重過廣陵同王西樵孫介夫夜話卽宿西樵

寓中

登車一歎歎羊裘已破朔風如鏃枉道那辭三百里  
爲與瑯琊情熟却遇興公鏗然屐響也過東頭屋三  
人相對寒燈淡暈生綠少頃客去余留王公呼我  
大被從君宿睡說三冬岐路事起坐何煩頻蹴綿定  
奇溫居殊不易握粟憑誰卜車中霜滿夜寒私語童  
僕

寄董玉虬侍御秦中

黑窰秋夜記臨風痛飲黯然言別我去汴城君繡嶺  
一樣前朝陵闕麥積山高木皮嶺滑度隴何須怯漢  
家節使天邊鏡吹不絕且自擲帽狂呼繞床大叫  
盧采輪誰喝莫聽渭橋嗚咽水殘了秦時明月鑿空  
音孔張騫緹兵鄧艾此事真人物驪山山下料應紅  
樹如血

汝南七夕病中排悶

誰家砧杵釐中原秋夜碧來如此何況今宵逢七夕  
天上鵲橋成矣人說黃姑貰錢營室捱盡愁滋味可  
憐阿堵神仙亦被驅使 我笑此語荒唐古今稗史  
誰是誰非是翻怪頻年瓜果鬧溷我婦人女子僕病  
未能吾衰詎憊晒腹爲佳耳汝南城下月明何限殘  
壘

半雪第四十詞以贈之卽次其自壽原韻

推梨讓棗記弟兄幼小講堂嬉戲暇則讀書兼擊劍  
不識世間程李捫蝨雄談屠龍絕技豁達饒奇計旁  
人嘖嘖陳家郎差足矣 詎料轉轉半生蹉跎萬事  
不稱男兒志從古多才人失路蕩子酒徒而已白髮  
無根青衫有鬼兀坐愁城裏還勝飲否飲時盞與重  
洗

鄴城感懷寄緯雲弟都下

漳河南下被浪花打散鄴宮遺事總是英雄兒女恨  
釀就千年霸氣馮馮淑妃來慕容廆去誰問他曹魏銅  
臺綉瓦至今換作殘壘 白頭來到中原吳鉤醉舞

不耐濤聲沸春鴈成行都北往謂緯雲子萬只剩離  
鴻一對一滯吳關謂半雲一留趙郡自謂也夜冷那  
能睡闌干拍遍淒然長念阿緯

湖海樓詞集卷十七

湖海樓詞集卷十八

宜興陳維崧其年著

武進周清源雅楫

錢塘高士奇澹人

華亭王鴻緒儼齋

崑山葉 淳淵發

念奴嬌

宋景炎席上贈柘城李蓼野

中年以後早傷于哀樂頓成頭白  
適過章華為劇飲  
倏遇中原詞伯劍氣縱橫酒腸跳盪老筆蒼蒼無敵霜  
寒月苦為君細吐胸臆  
今夜玳斝斑斕紅絃郭索  
搗鼓催行炙難得他鄉歡笑極况有吳兒似雪君欲  
歸邪住為佳耳底事搖鞭急回聽筵上歌珠一串堪  
拾

用前韻酬柘城李子金

雪飛千里步睢陽市上忽逢李白笑顧羣公摩腹語  
空洞容卿什伯嚼蕊吹花馬稍名理豪蕩真難敵轟

弟 維岳緯雲 宗石子萬 參閱

男履端 姪賜薛 校

逐拉雜酒酣披瀝衷臆 聽說盈浦鮫人鞋山龍女  
嗜古如牛炙會挾奇文過灌口浪打片颿堆雪豪奪  
何傷書淫不悔那畏波濤急擲書掩底百靈任爾爭  
拾

用前韻酬鹿邑張子武

昇仙臺上說當年風景榮青繚白曠望層湖窗撲水  
鴈子鳧雛千伯物換星移海枯石爛劫手棋逢敵至  
今廢館野花叢草沾臆 久矣仙不如頑哀多于樂  
且把鵝笙炙漢武秦皇今縱在也飽炎風朔雪飲酒  
千場讀書萬卷此外非吾急醉人須怒懷中憤墮難  
拾老子鹿邑人邑有昇仙臺

用前韻酬柘城王叔平

丈人安坐看三更簾外明星初白壯不如人今已老  
臣是江東亭伯萬事都非一年將盡才命交相敵悲  
歌何益且須美酒澆臆 幸遇梁宋諸公焚香梯几  
曲室紅爐炙千載鄒枚今尚在暫緩顛毛成雪袞袞  
祥鸞栖栖窮鳥來日翻飛急長鑱短柄空山橡栗能

拾

睢州田子益唐浙林孫嘯史徐次微袁信庵  
褚宸宣吳子純侯長六諸子邸中沽酒飲  
我別來數日荒村風雪有懷昨游用前韻  
寄之

三間老屋糝六花千里籬門都白伏枕窮村鐺折脚  
誰是巨卿元伯憶昨諸公惠而好我酒把奇寒敵自  
君之去離思萬種填臆 當日說劍談天吹簫刻燭  
轂蹀憑君炙幾日分攜人總老况值打頭風雪才退  
貧居心灰老至只有朋情急來春睢渙汀蘭期爾同  
拾

梁紫有和予百字令詞因用前韻酬之送其  
暫返錦池兼促卽來梁苑

朝來急霰似千層浴鐵一軍都白何事巖裝偏早發  
鞭指荒臺闕伯萬籟悲號六花狂舞歸騎疑衝敵離  
杯當盡人生有限肝臆 感爾學富侯鯖才同禁鬻  
偏嗜秦人炙也擬寒天牽老伴消過殘冬臘雪上冢



龐公移居杜老別遽來須急特車沙穩好將家具收拾

送錢礎日歸錫山同雲臣和曹顧庵韻

憐吾與汝只年將五十尚然棲逸槩上功名難辦取  
且自弄他文筆借面弔喪送人作郡歲歲饑驅出傍  
人大笑嵇康身嬾多蝨 回憶舊日酒徒凋零略盡  
愁殺松楸密恰似枝頭花欲謝祇剩十分之一歸聽  
鶯聲好攜芒屨野服須遮膝九龍山下仙糧何限芝  
木

冬夜聽梧軒題王右丞初冬欲雪圖填詞社

第三題

炎天看此便陰陰也覺滿林飛雪何況今宵風正吼  
絕塞膠弓都折冰裂龍堂凌鋪貝闕萬里關河結長  
空黯澹乾坤景色真別 安得盡敞瓊樓早催滕六  
一夜看親切玉戲定知應不遠料也無過來月水墨  
纔皴同雲暗釀人意先清絕只愁僵臥怕他近恁時  
節

留別錢礎日卽用其見贈原韻

昔年作客記美人劍士逢場都有燭淚堆槃簾舞雪  
薇帳輕紅垂斗劇孟家邊莫愁村外恰對銅街口爲  
歡并日底須寒食重九 今日騎省飄零蘭成憔悴  
辜負箏琶手拍徧闌干人事換贏得一場搔首歸去  
雙溪重尋三徑麋鹿真吾友愁來易醉慎毋多與之  
酒

春日讀京少梧月新詞寄題一闋并呈尊甫

慎齋給諫

斜風細雨算心情一往柔如春水梧月新詞剛入手  
脫帽忽然狂喜鸚鵡雕籠蠟磯古廟字字俱精綺時  
讀京少詠鸚鵡過孫夫人廟二詞高才妙作定摩秦  
柳牆壘 寄語尊甫先生陳生別後憔悴吾衰矣舊  
日酒徒零落盡相隔雲泥朝市變纓孤城夜郎遠宦  
歸况今何似傳柑家讌道余問訊如此

和于皇梅花片茶詞卽次原韻

梅精近日嫁茶星于皇自署茶村又曰茶星合併相

呼也得拾取粉英煎雪乳光映翠磁都白便趁春陰  
亟修水遞消遣天如墨故山茗事正應近恁時節  
常笑龍鳳高名旗槍倉父不稱瓊瑤液只借隴頭千  
百本隱隱吹歸橫笛點染天香芟除俗艷小泛真珠  
色花情水味融成一片無迹

葵花

東君罷繡剩猩絨一束亂拋牆角迸出戎葵娛永晝  
遶徧閒庭綽約蝶凝檀心蜂粘紫鬢爛比朱霞駁翠  
簾如水襯他榴火燃灼 別有小小錢般離離錦樣  
曾向川江濯謂蜀錦葵也 誰道房櫳春去久依舊紅  
芳似昨苦被陰濃遮他紅日愁殺傾陽藿金烏早醒  
海天鷄正咿啞

戲題終葵畫鍾馗一名終葵

誰將醉墨發長箋寫作十分奇詭鬚鼻魁肩形狀寢  
風刮鬣毛攢蠟空驛啼杉頰崖嘯葛目欲營天地三  
閩呵壁荒唐情態如是 休只破宅蹒跚荒江狼狽  
幽宵尋魑魅鼎鼎試看朝市上何限擲揄之子臥者

爲尸坐而成冢擇肉須來此笑渠笨伯翻愁鬼以公戲

讀屈翁山詩有作屈名大均番禺人初爲廬

山僧後徧歷九塞登華山挾秦女以歸

靈均苗裔羨十年學道匡廬山下忽聽簾泉厓冷瀑  
豪氣軼於生馬亟跳三邊橫穿九塞開口談王霸軍  
中毬獵醉從諸將游射提罷七首入秦不禁忍俊  
縹緲思登華白帝祠邊三尺雪正值玉姜毛女名思  
嫁笑把嶽蓮亂拋博箭調弄如花者歸而偕隱白羊  
瑤島同跨

夏日看荷花作

後湖長蕩見烟鬟霧鬢紅粧無數葉暗荷深三萬頃  
一片嫩涼成雨映水逾鮮倚風欲笑月又明南浦隔  
江試采有人一樣心苦曾在六士臺前文人舌本  
幻出花如許一自污泥淪謫久悵望瑤池懸圃漢苑  
飄香吳宮墮粉幾遍閒簫鼓何時華頂與君攜手歸  
去

月夜看桂花

淒清庭院乍金鷗壓下一天黃雪恰值爛銀盤又上  
冷浸水晶宮闕陣陣天香蕭蕭夜色花影扶疎絕誰  
家牆外洞簫不住嗚咽 記得玉兔金蟆團圓百畝  
碧落分枝葉自遇吳剛修桂斧浪被人間攀折萬里  
空明一尊瀲灩肯負當頭月姮娥莫笑老顛狂興如  
鶻

甲寅九日追感京洛舊游悵然成詠

無枝烏鶻記前年此日翻飛京闕曾預羣公黃酒讌  
玉佩珠袍齊列白月千門青天萬帳笳蓋真軒豁彭  
城南郡坐中多少人物 今夜故國荒原長江怒浪  
悲嘯魚龍發生怕西風吹破帽我有鬢絲新雪何處  
登高無人送酒俗煞重陽節縱然高望戰旗一片明  
滅

臨津懷古

笛聲緊處向霜空削下一天秋氣我買蜻蛉剛六尺  
紅樹之中斜繫聞說當年從來此處劇號繁華市如

今只有古祠閒映流水 歷數漢苑唐陵滄桑轉瞬  
大抵皆如此繡嶺金墉都換了何況彈丸黑子賽鼓  
前村巫歌極浦斷礎封羊豕滿陂紅葉老鴉銜上晴  
壘

西沅舟行遇颶風同南畊賦

天吳作劇鼓洪濤頃洞雷轟雪沸怒鬣淫漉掀宇宙  
頃刻半湖純晦白浪懸崖黑雲壓櫓人命同於螳太  
湖倒拔喧豚那許龍睡 我見天水犇騰帆檣飛動  
騎上霜篷背醉作擘窠書斷岸字蹟淋漓怪偉亂石  
將崩孤城欲沒老樹森奇鬼一羣野鴨帶啼觸響叢  
葦

途經溧水是宋周美成作令地慨焉賦此

詞推北宋有周郎香弱集名片玉未向大晟填樂府  
此地先留芳躅隔浦蓮嬌滿庭芳麗唱盡相思曲隔  
浦蓮滿庭芳詞俱美成在溧水署中作小亭姑射當  
初何限花竹美成令溧水時署中構一亭名曰姑射

彈指六百餘年詞人重過此閒愁悵觸一自汴京

時世換絕調幾人能續冷店騎驢野航聽鴈客睡何  
曾熟蔣山在望可憐依舊凝綠

炙硯

當年雪夜記貪歌嗜酒衝泥拖屐三十六簧寒不起  
醉把紅鵝笙炙脫帽顛狂解衣盤礴碎裂黃皮褶詩  
書何用任他堆老牆壁 今日冷淡生涯忍寒呵凍  
苦伴端溪石熾盡朱門紅獸炭翻惹蟾蜍淚滴銅雀  
臺荒中書君秃况是磨人墨直須焚却吾今老情無  
匹用君苗焚硯事

送韓聞西之吳門

虎丘鶴瀾問狂奴綦跡綠苔偏熟前月中秋停片舸  
特地來聽絲竹爛醉高歌墊巾側帽飽看晶輪沐平  
生疎放幾曾甘受羈束 今日帳後髯參車中新婦  
舉止何羞縮咫尺青溪難寄興何况雲山斷續君過  
橫塘船窗凝望定見寒崖綠爲余傳語比來離恨千  
斛

將發金陵前一夕大雪挑燈不寐悶填此詞

擬歸示蘧庵楨伯雲臣竹逸諸先生暨大士表兄南畊表弟

瓊窩粉窖儘六花一夜天公兒戲鑪火微紅官燭冷  
那不寸心如碎北渚田荒西疇租少枉說豐年瑞停  
杯大笑伯符志業難遂遙憶故苑風光釣徒詞客  
多少顛狂意好箇雙溪真畫本小閣於中位置萬玉  
編蓑千銀綴網漸理探梅事曲阿道上定憐風雪歸  
騎

春日玉峯葉九來招飲半繭園時梅花正開

酒間話舊有感九來向與吾邑某氏歌姬  
有目成之約今此姬已屬他人故及之

賣錫天氣恰春光嬌到九分時節城下小園圍綠水  
無數畫廊周折蝶翅憨紅蜂鬚簸煖滿院繁英纈君  
如不醉花時枉詡豪傑記否二十年前襄王筵上  
衆裏香曾竊金縷衫邊桃葉淚多少細憐輕閱柳絮  
簾櫳花枝年紀事去和誰說凭闌一夢帽簷慘徧時  
雪



范龍仙齋頭喜遇婁東許九日賦贈

六千三萬算老顛此後終當樂死十載詩名成底用  
何限東西衛尉一語驚魂杜陵曾說主將奴才子問  
他奴價而今果否如婢君已髡點吳鹽憐余種種  
亦復肩隨矣浮世幾場開口笑盜跖也知如是盜跖  
有云開口而笑者月不幾日燕子年光蟲娘庭院且  
住爲佳耳楊花如夢滿城日暮飛起

祖園與玉峯徐孚若話舊迴用前韻

立談數語似項王帳後楚歌齊起又似隣船商婦泣  
一夜琵琶聒耳紅粉辭鄉青袍失路從古原如是子  
規頻喚明朝春又歸矣拚取僧院聽鐘歌樓持鉢  
老作吹篴婢萬事灰頽吾不恨只負柔奴車子滿幅  
花箋半牀珊管怕殺藍田尉單衾空館鴨爐紅瘦香  
死

讀孚若長歌卽席奉贈仍用孚若原韻

霆轟電掣算君才真似怒濤千斛百感淋漓風驟起  
劈裂滿堂樺燭公醒而狂人憎欲殺抵鶻何須玉春

衫老淚鮫珠瓣瓣堪掬 不記三十年前灌夫使氣  
嘆喑驚隣屋彈指蓬萊今又淺短髮可能長綠詩酒  
前緣鶯花小劫世事彈棋局關山笛破欲吹吹不成  
曲

徐孚若招同諸子過飲余以怯酒先歸賦此

言謝

華堂鯨吸看羣公轟飲投瓊博簋髣髴昆陽軍馬沸  
屋瓦一時都壞畫鼓千搗銀鬢百罰促數籌如蠶人  
間堪唾紛紛會擲天外 我已閤走窮賓關通逋客  
逸出糟丘界愁極逢歡偏易感莫笑邇來胡憊遙憶  
杯前此時月下滿座傀俄態朝來早過一簾酒氣還  
在

丁巳仲秋廣陵寓中病瘧不獲爲紅橋平山  
之游悵然有作奉柬觀察金長真先生并  
示豹人穆倩孝威定九鶴問仙裳蛟門叔  
定女受仔園龍眉爰琴扶晨無言諸君

最無聊賴又西風吹到隋皇宮闕明月橋邊烟景換

依舊玉簫淒咽綠水全昏黃花早瘦往事憑誰說江  
山如畫恰逢愁臥時節 安得桓石虔來為驅瘧鬼  
放我眉梢結更把杜陵奇險句高詠子璋熱血僕病  
何妨人言可憎去聲笑汝擲揄物曼聲狂嘯碧雲片  
片都裂呼桓石虔來可以斷瘧又昔人評老杜子璋  
鬪饑血模糊手提擲還崔大夫二語亦可已瘧

丁巳中秋玉峯徐季重葉九來招飲三友園

同集為宋旣庭劉震修潘次畊徐立齋閣  
學顧恪如宋南金即席分賦

插天峭壁被風吹月浪洗來逾綠嵌壑蒼崖鱗鬣動  
萬隊熊蹲獅伏碧海青天年年今夜長見金波浴姮  
娥耐冷一輪細碾圓玉 况復地有名園人逢上客  
消盡愁千斛瘦石小橋苔徑悄掩映疎花秀竹更上  
山巔龍川墓上為我澆醪醪醉歸夜靜滿身零亂金  
粟山上有朱劉過墓

題劉震修小像即次原韻

平生謾罵笑紛紛眼底汝曹何物醉後筆窠盤硬句

宛徧倡樓粉壁柳絮縈鞭花枝低帽狂煞何曾歇側  
身攬翅角鷹颯爽毛骨 誰料同學少年半封侯去  
剩我漁舸隻擊碎唾壺顛欲死往事明明如月君賦  
離鸞僕歌老驥一樣關情切中秋近矣人間萬頃晴  
雪

賦得朝雲墳在落花中爲黃天濤悼亡姬陸

羽嬉作南陽鄧孝威有絕句云休啓疎簾

還遠望朝雲墳在落花中天濤有一扇扇  
上并圖此景

南陽詞客慣多愁善感最能吟寫近爲黃郎題恨句  
淒咽如聞夜話說道江鄉每年寒食細雨啼山鷓落  
紅萬斛朝雲墳在其下 更被水墨輕描丹青澹抹  
倍把愁腸惹短短墓門花似血點入倪迂小畫蝴蝶  
成團蘼蕪滿路鬧殺前村社倚樓人在爲他淚黠銀  
帕

壽蘧庵先生七十乙卯元夕後九日

元宵過了喜華筵重炤銀花火樹南極老人星獻瑞

恰接春燈二五族壓溫邢才雄管樂伯仲齊伊呂昇  
平盛事堯年老鶴能語 今日鬢髮蕭蕭關山歷歷  
也長安何處三見蓬萊清淺甚一笑人間今古鐵笛  
仙翁錦袍學士暫溷漁樵侶隔江長嘯月明何限更  
鼓

送吳豈衍歸宣城兼寄沈方艸梅耦長豈衍

工詩善篆刻季野先生嗣君也

淋漓頓挫借杜陵長句幻成波磔兀稟蒼涼盤瘦硬  
鬱若烟颿浪舶巉削虛無瑀鑄形狀萬壑蒼皮圻李  
潮吾衍古惟二子堪匹 歎息世態媿嬰人情渙忍  
奇字誰曾識只有敬亭山色好鎮日相看亦得歸臥  
烟霞閒逢梅沈定問余踪跡豪情冶興爲言都不如  
昔

小盜春蘭盛開與水仙相掩映瓶梅暗香復  
爾清冽雨窗無事婆娑其間詞以詠之

蘭滋梅粉被宵來厭浥嫣然新沐曉色幽幽涼逼硯  
冷翠遙連苔竹更喜仙葩纔離水國也把幽芬撲嬌

痕媚靨一時雨後開足 浪說天上瓊花月中桂子  
多少閒榮辱只有疎枝和野卉領鼓一生閑福散髮  
林端支頤澗側日取南華錄素蕊凝雪小廊又報茶  
熟

緯雲第八載京華昨始旋里尚憩西村未遑  
握手先寄此詞

湖帆浦笛是吾家遠閣闌干間物下嵌老梅鋪鐵蘚  
點綴池塘峭壁八載難歸百端橫集往事成鴻雪長  
安輦上知他若箇豪傑 喜汝徑辦歸裝買揚州小  
婦趁春潮發夜火羌村宵夢穩笑問燭因誰滅我在  
街南何時相對訴盈顛華髮更闌吟罷明明此意如  
月

憶半雪懷緯雲南鄉子詞有云燕關三度梅  
花不共看之句今梅花開候緯雲南返而  
半雪之墓已宿草矣詞以志痛仍用前韻

嗟乎余仲歎詩顛酒渴化爲異物記把一樽長憶弟  
白晝吟聲撼壁每到梅開便啼鶻血紅了千林雪金

臺可怪是他羈絆英傑 今日罨畫溪橋天涯人到  
也梅花重發只是題詩人去久字蹟也應磨滅故國  
茱萸殘年棣萼恨事多於髮水明樓上牕楞界上纖  
月

將之梁園舟中有感和大兄前韻 宗石

并州漸近想草堂無恙初冬景物罨畫溪雲曾飽  
玩怕玩烏衣巷壁兩月家鄉十年客路多少風和  
雪故園若輩誰爲捫風之傑 可惜擊楫中流英  
雄人去蕭瑟西風發我倚帆檣無箇事夜看疎星  
明滅滄海何心桑田增感此理真如髮行藏隨遇  
試看天上明月

南耕堂前綠萼梅花下作用東坡赤壁詞韻

空庭何有笑幽花以外都無長物一樹綠毛么鳳挂  
零亂明窗粉壁斜倚闌干微拋酒盞笑玩林間雪春  
寒猶沍凍禽驚起傑傑 可惜花似當年看花人漸  
老悲歌空發料得前村花更好和了水雲明滅欲折  
繁英倩他壓帽絕稱蕭蕭髮角聲吹落堦前堆滿晴

月

春日同緯雲南畊徧歷南嶽諸園林仍用赤

壁詞韻

春山勸我只今朝須盡此杯中物莫把閒愁千萬斛  
題濕酒家牆壁石畔泉流林間風起颭數枝香雪一  
樽醉取千秋射虎人傑 况值北鴈初歸巖花隨飲  
興共參差發何限向來哀樂事一笑浮漚生滅日落  
帆輕花欹帽重暝翠侵毛髮瀕行戀戀空山定好明  
月

玉峯闕若韓盛珍示王成博丘近夫諸子公

讌余輩於南芝堂席上同青際竹逸緯雲

紀事用赤壁詞韻

玉峯高讌看簪裾滿座一時人物况值杯中山色好  
吸取晴崖翠壁金馬新知銅龍舊識只我頭成雪烏  
絲題徧羣公漫許詞傑 坐有舉舉師師褰簾纔一  
笑嬌歌先發若使主人知此意應遣蘭堂燭滅住固  
爲佳居殊不易種種余之髮明朝歸去綠蓑長釣溪



月

由亳州至歸德途經木蘭故里有祠在焉

苔垣蘚逕見靈旗玉貌娟然幽處傳是木蘭遺廟在  
多少神絃賽鼓繡袷蛾眉紅粧猿臂颯爽真軒舉雌  
雄撲朔世間何限兒女 今日滿目關山極天士馬  
殺氣連營苦安得月明飛錦繖壓倒蕭娘呂媯娘子  
軍空女郎祠圯俛仰悲今古空牆壞壁畫衣剝落如  
雨

贈雪笠上人上人係石城僧時寓居睢陽

小長干里記巖花嶺烏六朝僧窟一自秣陵凋敝後  
難穩故山瓶拂蹙踏天龍抨彈獅象人境俱雙奪衲  
衣手綻曾經幾載飛雪 可惜梁孝園荒侯嬴館廢  
往蹟多磨滅誰耐枯禪耽澹漠隱隱眉間俠骨古寺  
城根破籬湖面餓伴殘碑碣秋行至矣茅堂相對疎  
豁

周弇山攜具入關齋同亦人恭士子萬弟諸

君快飲風雨颯至炎歊盡解詞以紀事

狂飈挾雨恰冰車鐵騎一時殫擊倒拔南湖高十丈  
無數巨魚人立飽噉哀梨橫驅陣馬徙倚清涼國臨  
風一笑蝟毛鬚捲如磔記否烟雨樓頭舊游星散  
多少南和北二十餘年吾竟老贏得暮雲堆碧只有  
周郎仍然年少同作天涯客無多酌我爲君起弄長  
笛

開元寺納涼聽客話闖賊破城舊事

夜涼水寺有白頭閒話傍蝸牛屋說起黃巾初入洛  
正值中原百六萬馬俱瘖孤城欲沒殺氣騰原陸鬼  
謀人社啾啾市上歌哭語久嗚咽難勝向戍樓借  
取四條絃續不見女牆純鐵色恨血至今猶綠落日  
黃河老鴉白項啄盡賢豪肉休論往事碧天今夜新  
沐

游京口竹林寺

長江之上看枝峯蔓壑盡饒霸氣獅子寄奴生長處  
一片雄山莽水怪石崩雲亂岡淋雨下有龍鼉睡層  
層都挾飛而食肉之勢只有鐵甕城南羣山羸秀

畫出吳天翠絕似小喬初嫁與顧曲周郎佳婿竹院  
盤陀松寮峭蒨最愛林臯寺徘徊難去夕陽烟磬沉  
未

毘陵道中有懷四弟五弟即用四弟感舊原

韻

麥仁店後記斜陽分手柔腸欲絕從此南飛餘一鴈  
肅肅長征不歇絮盡蘆汀拍殘楓岸風景增悲切昨  
過江上赭圻一片成血 今日貰酒蘭陵銅官列岫  
向水窗明滅惡浪怒濤經過了纔見故園秋月短髻  
聊蕭左車搖動狗竇嘲余豁夜長獨睡布衾僵臥難  
熱

附感舊原韻

宗石

式微王謝嘆飄蓬感慨悲歌欲絕記得承歡聯鴈  
序嘯詠何時暫歇故國江山梁園風景夢裏增悽  
切登高悵望孤兒淚盡成血 恨少十萬黃金供  
吾揮灑意氣何曾滅成敗總同蕉鹿夢好似春花  
秋月健筆元方謂大兄饑驅阿季相對愁難豁遙

思遠閣有人閒把香爇遠閣先少保公讀書處也  
今三兄居焉

秋夜攜姬人稚子借宿椒峯東園追憶與白  
生讓木叔氏虞掌讀書此間已十七年矣  
今二子已亡而余重復經此不勝今昔之  
感詞以愴舊

枯荷敗柳恰書郎再過畫樓全圯十七年前蕉鹿夢  
斜倚風廊重記白傅高人竹林賢阮談笑饒名理飛  
觴覓句琅玕刻盡空翠今日擊筑筵空絕纓會散  
人去多年矣我作驢鳴黃葉下沉痛忽焉盡致繡襖  
童烏雲藍小妾匿笑屏風地癡兒駭女那能了乃公  
事

湖海樓詞集卷十八

...

...

...

...

...

...

...

...

...

...

...

...

...

...

...

...

湖海樓詞集卷十九

宜興陳維崧其年著

和州戴逵孝無忝

丹徒李基和梅崖

華亭錢鼎瑞寶汾選

海寧弟奕禧六謙

百字令卽念奴嬌

顧梁汾雨泊蛟橋填詞見寄得軟繡迷香二

語狂喜跳踉失脚墮水書來語我以故不

覺捧腹詞以調之亦用朱希真韻

空江采石記錦袍醉墮昔年李白今日蛟橋傳故態

千載重來此客擬探驪珠海天此夜休遣龍綃隔翻

身直下驚濤跳起成雪我作持履無方君休一去

曉夢迷蝴蝶蝶乾後蓬萊智井似可有人間花月暝翠

蒸衫鬧紅壓帽狂殺何年歇玉京桃放待余折則同

折

游楞伽山上方寺是日微雨

石湖一幅似春羅鋪在楞伽山下上有叢祠熒賽火  
照徧盤門萬瓦白馬二郎青溪小妹繡幔搖春夜憑  
闌遙望水雲蒼莽難畫 來往招飈花枝蘸些微雨  
倍覺添妖冶鬢縷柳絲都一樣總受東風飄洒亂石  
陂陀羣峯峭蒨滿逕沾蘭麝半湖純黑伍胥潮又來  
也

贈陳嘉玉

萬家水市被垂楊映得酒旗都綠細雨淋浪春欲暝  
愁煞蒲帆六幅烟裏停橈花間命屐小叩幽人屋素  
蕊凝雪果然人淡如菊 君自生長錢塘移家喜看  
罨畫紋鋪穀說在東風鶯舌裏聽慣烏絲一曲詞客  
生平男兒意氣何必曾相熟掀髯長嘯爲君盡此醜  
醜

雨窗懷松之南水

絲絲點點聽簷前不住隔紗窗滴一片濃雲遮遠岫  
那辨銅官離墨寶鼎香焦畫廊花瘦阮又無心摘茶  
烟颺起細煎花乳翻白 幾日梅子應黃先將此雨

送箇愁消息我在家鄉愁欲死何況異鄉羈客簞帽  
停舟衲衣持鉢買酒還無直知他何處水邊拖盡吟  
屐

雪灘釣叟爲松陵顧茂倫賦

翁家何在在三高祠下景尤奇絕一派漁莊連蟹舍  
百里水雲明滅最怕閑鷗生憎野鴨占了涼波闊釣  
竿斜漾珊瑚樹上輕拂昨夜凍合江天糝綿舞絮  
冷把龍宮掣惱殺涓濱垂白叟悞了蘋風柳月菰米  
家鄉清虛世界萬事何須說夜寒吹火推篷起掃殘  
雪

送徐松之還松陵兼訊弘人九臨聞璋電發

諸子松之亦名崧

生平慕藺笑人間竟有兩相如者解唱春城寒食句  
却是此韓胡也廿以前前記曾與汝爛醉臯橋下我  
髯君黑路旁紅粉輕罵今日髯已成絲黔還似昔  
重會荆南榭篋裏雲山詩卷在只被雨淋風打撼笛  
旗亭聽鐘禪院總是淒涼話垂虹橋畔飄零多少同



社

淮陰閣再彭以破環詞索和爲綴此章

淮王城下有扶疎叢桂香分蟾窟攜得團圓天上影  
琢就鏡奩中物立本清高香閨對綰紅苕同心結紫  
金跳脫讓他光鑒毫髮 詎料鳳去鸞孤瓊枝一樹  
忽被罡風裂柳絮簾櫳無限好堆作安仁髻雪畫篋  
閒搜宵來失却一串玲瓏月半規破鏡算仍飛上瑤  
闕

客有善絲竹者以箋索詞漫爲賦此

旗亭舊事記曾經見汝寶釵樓側瓊樹兩行誰最少  
第一屏間白晳翠滑鸞鞞紅香桃綬絕藝千金直襄  
王筵上纏頭衆裏爭擲 今日白髮何哉青衫司馬  
仍會秋娘宅能得幾迴渾脫舞舞清淺蓬萊非昔紅苕  
村莊菊花天氣淪落無人識棖棖邏沙不堪聽汝重  
摘

聞鴈

金風凜凜將冷鴈糝下半年天煩惱拚逐征南諸將帥

飛透黃榆白草萬里邊愁一行兵氣辛苦憑誰道  
雲裂石數聲橫度林表我且緩把一樽水明樓畔  
側聽心如擣響帶秋砧偏覺慘更犯幾般曲調南浦  
烟深後湖陰重月挂關門小不如北去蘇卿雪窖將  
老

長安元夕和家山農倡和原韻

尋常隔歲預商量賞玩來年元夕燕未銜將泥便軟  
糝徧蓮鈎綦跡滿院燒紅九衢漾碧萬斛幽輝濕東  
風幾陣暗吹此事成昔今夜灑灑深杯玲瓏低唱  
難把愁兵敵悞了玉梅花底約只做鳳城羈客歸路  
三千春宵十五誰遞他消息舊家何處月華人面同  
白

贈吳門周履坦時以丹青供奉內庭

盤龍後代擅虎頭絕藝風流淹雅一日聲名動人主  
不數當年曹霸架上奇鷹宮前稚蝶一一遭烘寫布  
衣親見鳳樓一片鴛瓦可有襄鄂弓刀金張袍綬  
要上凌烟畫月給俸錢愁不飽只夢闔閭城下滿眼

京華錦衣玉貌總是悠悠者青熒燈火飄零共作情話

己未長安中秋時值京都地震是夜微雲掩

月

西風帝苑正停杯爭盼一輪圓月坐久涼蟾猶未吐  
靄靄暮雲偏結低躡冰綃深藏桂殿不放姮娥出也  
應愁見有人千里華髮今夜地軸頻翻坤輿陡撼  
怕被饒蛟掣那有銀牆和碧井留待金波堆雪三市  
霆轟九衢電駭屋瓦昆陽裂問誰無恙天邊惟賸瑤  
闕

送周求卓之任滎陽

滎陽京索是當年劉項舊爭雄處薑紫蝸紅纏碎碣  
略辨幾行秦楚汜水重關敖倉賸壘蒼莽空今古西  
風夕照老鴉啼上枯樹君到試問當初鄭虔故宅  
三絕猶存否贏得兒童和笑說文采周郎獨步故國  
情親新涼節物送爾驅車去休輕百里此閒鞏雒門  
戶

送鈕書城之任項城

碧鱸錦稻記君家舊傍垂虹亭子疎影暗香姜白石  
一日起而爲吏綬染紅桃符分銅虎差足云豪耳欣  
然捧檄當年毛義如是極望地入銅陽邑名南頓  
樹短纔如薺去約官僚閒射獵應認前朝戰壘古驛  
熊啼荒村虎叫日落城牆紫虛聲處士此言專仗君  
洗

詠陸雲士萬年冰扇墜

長安六月玉河橋柳下涼冰爭賣銅椀擎來高十丈  
只是炎酷難耐忽見風前水晶墜子人意先瀟洒  
颺滿院似聞何處清籟傳道太華蓮西堯年古雪  
結此玲瓏塊磨却千場閱歲月冷看人間成敗桂窟  
蟾精松根琥珀凜冽還堪賽更誰偷嵌幾叢藻荇橫  
黛

棠村夫子席上詠米家燈

東風作陣颺晶籠百盞玲瓏低亞淺倚紗屏和笑指  
此是前朝翠畫有蝶皆飛無花不笑翻覺丹青假何

須周昉搓酥滴粉描寫 聞說上國樓臺東京士女  
最重元宵夜兩載傳柑渾寂寞辜負月明鴛瓦詎意  
今年尚書座上人在春燈下昇平遺事廊邊鸚鵡能  
話

庚申長安閏中秋

姮娥天上恰晚粧添罷更臨瑤闕四十七年纔又見  
閏了中秋佳節中秋自甲戌閏後今歲始再閏再瀉  
金波重懸晶餅分外鋪晴雪廣寒宮殿依然翠鎖齊  
掣 可惜耿耿孤光蕭蕭夜景縱好成虛設贏得冰  
輪圓兩度多炤一番華髮萬里鄉愁五更寒信幽恨  
憑誰說停杯南望山中叢桂應發

贈程令彰令彰新正五日為四月初度

東風纔動正萸開五葉花飛六出雪正晴時天倍好  
越顯帝城春色門挂桃符釵搖綵勝節又隣人日風  
光如此拚他爛醉須直 愛爾句闌蠶叢詩驚鬼膽  
餘子何當嚇四十功名年未晚且溷朱門杯炙二陸  
才華謂難兄綉章兩程家學底處無人識街燈漸鬧

爲君撰擋箏笛

題徐晉遺表弟所畫牡丹圖并以誌悼時正

是花大放

璧人年少記臨風側帽姿尤清絕曾在沉香亭畔醉  
偷譜清平三闋更取名花圖成粉本惹殺狂蜂蝶盈  
盈着紙誤人幾度攀折 今日畫可羞花花偏入畫  
一樣無分別可惜空山埋玉樹此恨只和花說縱有  
丹青也應塵土拌了嬌紅色花前一嘆胭脂亂撲成  
雪

無愁可解

題楨伯詩詞卷尾用粘影詞韻

記少日從君使健筆如風蛟螭盤攫更短衣破帽橫  
穿欲度絕漠蹴鞠彈箏豪士約撫掌轟轟笑樂似阿  
黑一輩人裂眦奮袂神色甚惡 詎料淪落關河將  
冶習狂名一朝除却笑古今青史細碎渾如蝸腳讓  
餘子纍纍若若只佳句清抵空山夜泉剪燈讀睡難  
着

彩雲歸

簸錢

買花歸倚綉簾前，問侍兒剩否金錢。邀隔垣女伴，消閒晝還趁取苔石幽鮮。輕輕簸青蚨，不定怕撩人鬢。蟬競負閨中劉毅，喝雉喧闐。琅然滾歸牆罅，與柳綿一樣勻圓，惱他隣女嬌小。羸處慣倚輕鬟，喚重來頻呼不應走。弄牆畔鞦韆無聊甚，閒擲五銖暗卜歸船。

春夏兩相期

王家營客店排悶

古黃河，噲吹鞞鞞千片葦。花颯颯何事衝炎愛把軟紅塵，踏舞衫歌扇。總生疎馬客，餅餠空拉雜彈罷哀。箏傾來濁酒自相酬答。何門珠履堪跋，且燕秦齊趙騎牛荷鍤自笑平生不慣縱橫，押鬪悶來車轉腹中輪狂時劍動親身匣。莫管今宵茅店荒涼，鷄聲鳴邑。

初夏同友人東郊外訪吳繩圃園居

有羅羅水烟千頃夜來初浣籬徑紫艷紅芳屋角墻  
頭相映草香小巷入都迷竹暗層扉敲誰應淺漾風  
簾愛他草閣居然舴舺 幽棲不似塵境只閒驅菊  
蠹小除松癭濕翠難名到此萬緣真冷牙籤亂插道  
書香板橋對掩僧廬靚惆悵曾分半榻鶯聲一杯花  
影

遶佛閣

初冬同友人小憩中隱禪院用片玉詞韻

早霞昨斂行散郭外盡歷溪館塘宿蒲短細沿磬響  
來塞戒壇慢境幽竹滿閒豎拂子小叩慧遠妙諦微  
婉更沾茗粥塵巾忽焉岸 坐久漸忘却花影移楞  
還幾線更愛晴堦砌成明鏡面歎急景浮生虛負漏  
箭悶懷誰見似殘菊無聊倚簷零亂再來期甚時纔  
展

寒夜登惠山草庵貫華閣

亂峯堆髻夕景木末殘雪崖際一派空翠瓢堂語悄  
山牕落松子小樓欲墜斜嵌巖壑蹲若奇鬼暝色晴



霽髻絲禪板渾忘在塵世 開士暮歸晚鉢向石橋  
深礪洗坐客松寮鐘鳴黃葉寺喜今夜關河一碧千  
里感傷身世看六代青山月華如水是千秋倚闌人  
淚

由劍池循石磴上至平遠堂側覓徑復折而  
下至小武當有奇石縱橫林立佇眺久之  
嶺欹棧仄循壁俯瞰潭子深黑風起濤湧此身幾被  
包山老龍得古苔繡蝕騰擲直上霜磴如拭高處奇  
絕曠望鄧尉支硎翠螺滴 暫息塔鈴側又蹈虛空  
臨不測蘚滑境危盤盤深曷極見老樹槎牙三兩離  
立雨淋風裂似猱狄鬚髯作爛銅色忽顏唐化爲奇  
石

爲李武曾題長齋繡佛圖小像

冷牋雪研纖膩滑笏恰稱烘寫偷翫閒把有人認是  
年時瘦司馬俊游都雅帽影蘸粉衫縷沾麝鬢雨啼  
鷓略記小驛奢香醉題帕 舊事一彈指可惜花開  
多易謝此後鬢絲吳霜將暗惹且料理心情消向蓮

社苗竿低亞捧一軸迦文綃帶輕洒傍風前玲嶼斜  
挂

東風第一枝

詠綠萼梅和呂聖求韻

粉界檀腮烟籠膩頸玉奴素質輕約風前乍坼紅鬚  
月下低含綠萼一枝水上也不管鶯啼燕掠最憐他  
不甚分明飛破瀟湘白鶴隔蟬翼層層都薄打稷  
雪冷冷又落有情故亞樓頭無聊自開屋角日高慵  
起慢搖動綠紗簾箔看苔錢色上花枝碧透何郎官  
閣

試燈夕同雲臣京少賦

萬戶燒紅千門照茜春燈零亂如許蓮釵綵燕還搖  
蘭街火蛾纔吐常時此際只做弄滿樓絲雨喜打頭  
新歲冰輪將到十分圓處影對着翠奩私語袖招  
着玉纖暗數今宵且疊衫痕後日定飄裘縷經年盼  
望容易近鳳城三五囑孟婆霧鬢風鬟莫把夜情吹  
去是晚大風

丁巳元日大雪是日迎春

雪壓新年風飄殘臘瓊樓粉落如雨桃符素鎧離披  
神荼瑤簪濟楚天公好事總餽徧山城炬杖小闌邊  
飄瞥紆迴點綴辛盤椒俎泥蹴透紅箋致語寒勒  
住鈿車游女土牛紺軌犁霜粘鷄花冠縈絮盈街彩  
仗畫一片慵情嬾緒白茫茫凍合乾坤不辨春來何  
處

月杪自吳門歸追和南耕毘陵元夕之作

上水船遲落燈風快歸家黯淡如許打門有客謹呼  
衝泥向人驕語香詞滿幅總故苑狂朋俊侶說郡城  
前夜閒行多少珠歌翠舞乍髣髴花閨畫鼓再想  
像梅邊游女毫端似落星橋卷中疑謳金縷舊時情  
事悵光景拋人何遽但聽他提起元宵便有費思量  
處

詠玉蘭花

細雨搏酥好風搓粉枝枝斜壓闌檻牆邊無限玲瓏  
樓頭許多掩冉瓊姿簷外總不受蜂侵蝶犯自生成

別樣心情誰耐風光穠艷 隔着水盈盈颭颭籠着  
霧亭亭雅淡似憎杏把紅薰微嫌桃將絳染空濛皎  
潔來相伴空房小膽罨玉樓一片花光逼得盤龍鏡  
暗

踏青和蘧庵先生原韻

簷溜纔停街泥乍浣花梢日影搖午陌頭霽景增妍  
水邊烟光添嫵苦衫笑檢憶春在謝橋深處正沿堤  
叫燕吟鶯吹滿一天風絮 籬杏糝如塵髻縷溪柳  
罨帶烟朱戶畫院江左亭臺釀成花朝節序爲歡併  
日况漸逼韶光百五約鈿車來日重遊又聽小樓宵  
雨

玉燭新

詠燭

五更寒作陣正繡幕重重一枝斜隱當時曾在春宵  
底炤足美人春困雲沉雨重謝倦眼看承逾俊珊枕  
畔翠袖輕遮怕他隔簾風緊 如今長伴空牀風也  
弄孤燈閃閃成青暈蘭心剪瘦誰聽得掉却玉釵聲韻

寸  
金荷漸燼結徧缸花無準問紅燭今夜和愁燒殘幾

琵琶仙

鬲門夜泊用白石詞韻

暝色官橋消盡了帶雨綠帆千葉驛口夜火微紅  
簫正淒絕記醉惹銅街喚馬更閒凭畫樓聽鴉無數  
前情許多往事檣燕能說只細數花草吳宮除夢  
裏依稀舊時節欲買韶光暫駐待來春翠莢縱尚有  
鷓夷一舸怕難禁伍潮堆雪悔殺麝帕鴛衾那年輕  
別

泥蓮庵夜宿同子萬弟與寺僧閒話庵外白

蓮數畝

倦客心情况遇着秋院擣衣時節惆悵側帽垂鞭凝  
情佇寥泐三間寺水窗斜閉一聲磬林香暗結且啜  
茶瓜休論塵世此景清絕詢開士杖錫何來奈師  
亦江東舊狂客惹起南朝零恨與疎鐘鳴咽有多少  
西窗閒話對禪床剪燭低說漸漸風弄蓮衣滿湖吹

雪

題汴京大相國寺寺相傳魏信陵故宅唐尉

遲敬德監造

近婦飲醇悵失路英雄暮年無忌轉盼魏寢全荒朱  
門換蕭寺賺人是宣和舊譜惹恨有夢華遺事傳說  
東京當初燈火遙映南內 休閒話折戟沉沙只此  
地曾經浪淘洗剩得蠹痕虫篆蝕尉遲碑字正罷酒  
憑闌時候遇西風落葉盈砌多少落拓心情飄零身  
世

四代好

泛艇春溪作

碧透雙溪尾蒲桃浪慣被煥風吹碎琉璃正滑簾紋  
小展一川空翠春衣篷艫慢倚十載事從頭都記算  
飄零曾渡汶水漳水沁水泝水 汶水長繞孤城漳  
水又抱銅臺廢址可憐沁水還灌太原殘壘三關怒  
濤夜起過泚水重嗟餘耳總不如春水江南柔藍千  
里

雙頭蓮

留別集生

孺子長貧記少日江東隨余游射重來客舍但細數  
此地舊游都謝總被捲地西風把燭花吹炮成獨夜  
只有君家榻懸爲余仍下憶昨食酒而悲學王郎  
斫地倚風悲咤歌場舞榭祇添了一夕雨窗閒話多  
少剩水殘山付丹青曹霸笑客至泥拔金釵粧臺輕  
罵

夏日過叔岱水墅鋪同諸子觀荷用放翁詞

韻

老樹空村借風幔斜張儘堪栖寄飲如渴驥碧筒勸  
領略野香荷氣詎料蒼莽中原有粘天雲水依稀似  
蓴脆鱸肥風光故園還記攜手散步林塘羨無愁  
鷗鳥向菱蘆睡江南游子誰憐我水上倚闌心事擬  
倩繫日長繩奈斜陽貪逝風颭處十萬紅衣乍眠旋  
起

龍山會

暮秋蘧庵先生自吳中歸詞以訊之

颯沓梧宮葉舞徧西風又送人歸也稻梁吳地儉天  
外鴈揀盡寒汀空下誰識故將軍只亭尉偏工醉罵  
王和霸銅仙月中如鉛淚瀉 剡曲興盡王猷懶心  
情最聊蕭難畫買烟航雨艇歸計穩入手碧鱸紅鮓  
我倚墊巾樓見君蒲帆恰卸隔水榭一尺釣絲堪對  
把

湖海樓詞集卷十九



卷十六

[Faint vertical text columns, likely bleed-through from the reverse side of the page]

湖海樓詞集卷二十

宜興陳維崧其年著

睢州田蘭芳梁紫

弟 維岳緯雲 參閱

秀水徐嘉炎勝方 選

宗石子萬

武陵胡獻徵存人

男履端

東明袁 佑杜少

姪賜薛 校

五福降中天

甲寅元日

五更爆竹千門響  
轟醒陽烏春睡早  
湧彤輪競開朱戶  
恰對南山晴翠桃符  
荔粉喜街影暄妍  
簾痕韶麗多少輕烟  
嫩靄做就好天氣  
磨徹菱花雙蒂綉奩  
爭早貼宜春字  
畫粉樞兒銀泥勝子  
帶笑上上人頭髻  
年光已在牆外花鬚  
橋邊蘭蕊拜罷勝常  
臉潮紅似醉

丙辰元日和蘧庵先生韻

翻何青帝姍姍也  
將近江南幾驛  
婪尾深杯換頭小  
令治習那能銷得  
任他仙釋算換了  
年光也應沾臆

慵倚闌干側帽不忍弄烟色  
差喜漸無人識楞嚴  
纔註罷門庭寂三徑苔鋪一籬梅綻相與從無疎密  
鶴窺草閣雀啐柴門宜春休帖愛煞溪痕斜橋成小  
立

穀日和蘧庵先生仍用元日韻

春田躑躅開將徧紅透水橋烟驛隔歲辛盤昨宵金  
勝又聽青鳩得得迥寒都釋正牆嗟花冠隴翻嬌臆  
且把農經一卷映午餘晴色  
春意窗楞先識雨工  
行雨罷茅簷寂苦入梅園翠歸蘭圃裙幄料應鋪密  
歡生祈穀兆叶占年比閨安帖閒看蜻蜓釣竿絲上  
立

東燕歸慢

虎丘遇劉元玉因憶東臯舊事賦感

前事濛濛對天邊皓魄場上晴空僧窗秋夜話霜磴  
故人逢蘇臺原是綺羅叢被牧笛吹來幾陣風揚州  
舊花月也應與此間同  
歌館閉舞衣散玲瓏老野  
狐窮歲月已非光景在算常到夢魂中蓮塘墜粉泣

香紅總綴就閒愁點客篷杳靄棹歌響又何處度疎鐘

松陵道上追感計甫草趙山子兩孝廉用湘

瑟詞韻

醉欲騎蓬憶當年吾汝意氣凌虹交情千里外心事  
一杯中情人墓上雨濛濛又水調吹波夜起風吳江  
落楓葉只餘我舊鵝籠 洛水戲山陽笛淮陰釣未  
央鐘徐劉應阮俱凋謝算此恨古今同倦游蹤跡類  
臨邛且度曲吹簫倚小紅姜白石詩有小紅度曲我  
吹簫之句來朝過鶯脰好撥棹破晴空

夜合花

爲丁子涇催粧

人柳腰眠聖檀額注犢車催下屏風勝常道罷腮邊  
春暈微紅呼燕燕喚蟲蟲桂堂西小著輕容問伊姓  
氏父名鄭季母號樊通 鶯聲夜半玲瓏多少帳前  
細咳爾汝歡儂今宵夜冷勸郎文籍休攻蘭缸細鴨  
鑪濃卸花簪早傍薰籠羨他大婦偏憐敬禮代掩珠

櫛

廿二夜原白堂中觀劇卽事劇演精忠

青漆門邊碧油坊底一庭霜月初濃隣家夜賽春燈  
社火攢空傲越覘舞巴童颺靈旗不滿微風正無聊  
賴聽歌簾罅衝酒闌東 神絃一曲纔終更有梨園  
雜爨院本絲桐岳家遺恨夜堂一片刀弓悲曼衍嘯  
魚龍惹當場淚灑鷓鴣紅須行樂耳何知底事且盪金  
鐘

慶春澤

春陰

已近花朝未過春社小樓盡日沉吟暝色連朝江南  
倦客難禁門前綠水昏如夢粉雲遮失却遙岑謝橋  
邊凍了梅魂結了春陰 年時恰是鶯花候正黃歸  
柳靨紅入桃心舞扇歌衫參差十里園林東風吹得  
韶光換詎料人真箇如今問何時日上花梢細呀鳴  
禽

換巢鸞鳳

詠燭

暝色初臨正金荷灼灼鳳脰沉沉燒殘終有淚剪斷  
豈無心饒脂注得十分深光翻金粟影動瓊林春藥  
上看帶笑花開似錦瘦沈躊躇甚曾記華堂半滅  
情難禁金鑰傳時玉堂難處對對紅酥翠沁蓮燈緩  
導上元遊蘭膏濃挽平康飲如今絳蠟照人長是孤  
寢

春感

月煖絲柔正花枝冪冪鳥語鈎轉斜橋雲似粉合澗  
水如油臨風却憶少年游閒蹤跡徧旗亭酒樓如今  
也只淺淡眉痕相鬪知否人感舊滿砌靡蕪糝綠  
窗清晝記得年時暗曾經處深巷紅欄弱柳飄盡楊  
花雨偏肥摘來梅子春先瘦悵風光更消人幾徧回  
首

雨中憶蔭綠軒前梅花正開詞以代訊

倦理紅凋有如塵似夢萬斛閒愁濛濛沾綉幌浼浼  
漲銅溝帽簷小側撚花枝倩鶯語替簷前雨鳩春山

影恰幾日都如中酒  
低首東風後記得君家一樹  
偏嬌秀每趁年光慣將香雪亂惹倚樓人  
手開處斜  
憐綠波明折來雅穉瓊肌瘦  
雨窗問訊只今曾否依舊

高陽臺

題余氏女子綉高唐神女圖爲阮亭賦

巫峽妖姬章臺才子賦成合斷人腸  
綉閣停針含情想像高唐渚宮舊跡  
今何在不分明水殿雲房驛蟬  
鬟憶著行雲恰費商量  
蘅臯暮雨淒涼只楚天一  
碧與夢俱長霧縠霓旌幾時重  
得待君王小唾紅絨  
思好事却剪刀聲出迴廊更添些  
紅杜青蘋做出瀟湘

繡佛

榻盡翎毛刺完花卉生憎滿燈  
春愁一事縈懷纔忘  
又到心頭濟尼索繡髮陀像  
猛思量此諾須酬研繚  
綾香要先熏樣要親鈎  
配勻五色長生縷記鴛摩  
夙業迦葉前游縵線飛針  
盈盈分外纖柔狂夫悄悄問

儂何願暈春酥忍笑凝眸且添他旛蓋飄颺水月空  
幽

壽樓春

爲白琅季節母吳孺人賦

裁綃衣霓裳配羿妃清冷瓊女蒼涼夜夜長歌寡鵠  
短歌愁鳳摧短髻爲秋霜染啼痕眠芊幽篁歎海碧  
天青蟾孤兔老六十載共姜 築柘館連芸窗更授  
經帳底畫荻簾旁機聲中攙洛誦書聲琳琅剪玉樹  
成佳郎羨季心詞壇擅場俠哉女公孫萱花栢舟千  
古香

春日追昔游

尋春來劉郎惹一生惆悵千種思量尚記風前秀鬢  
月中凝粧斑竹店梅根坊颭水花晴絲悠悠颺恰宛宛  
調鸚盈盈喚馬手語粉巾香 斜日下東方狂將十  
年前事吹入微茫贏得笙篴昔昔琵琶棖棖花壓帽  
啼霑裳怕重逢年時韶光又酒旆斜挑誰家小門青  
粉牆



木蘭花慢

歌筵感舊

誰家搖步障明月夜賞花天正壁帶紅稠簾衣綠縐  
夾路釵鈿從前也曾聽處漸如塵似夢記難全遮莫  
延秋門裏不然道政坊邊銅仙有淚瀉如鉛攬鏡  
惱華顛詎飄零江海重歸故國再上珠筵龜年莫停  
歌拍怕舉頭皓魄不長圓正月新蒲細柳滿場橫竹  
么絃

壽虞山張以韜四十應王石谷之請

虞山山拂水風倒捲吼簾泉想紅豆村庄絳雲樓閣  
翰墨流傳風流後來誰繼有天都逋客漢張騫水檻  
斜欹垞北晴軒正面湖前王維今日畫中禪說爾  
最豪賢羨坊號光和里名通德臺曰超然行年只今  
四十已手摩銅狄歎桑田俠骨球場酒舍閒身茶竈  
漁船

壽吳母黃夫人五十夫人余友園文賢配

紅雲飛一朵鸞鶴下叩真妃是江夏無雙吳公第一

兩好門楣相逢瑤臺擘脯說蓬萊清淺事依稀興慶  
池頭命婦鹿門山下賢妻 恰依然椎髻牛衣四十  
九年非趁茗霏霜紅洞庭水碧茶庵漁扉回頭莫論  
舊事記滿湖燈火醉翁歸坐上麻姑天姥膝前謝淪  
王微

汴梁城內有李師師巷經過感賦

是東京舊蹟愁漠漠雨絲絲悵趙宋繁華樊樓語笑  
總被風吹淒其剩勾欄在照綠窗曾挂月如規今日  
頽垣廢井當年舞榭歌基 師師雪貌玉爲肌玩月  
賞花時惹君王夜幸香橙暗擘膩笋潛攜誰知小屏  
風從有周郎低唱斷腸詞一代春嬌寂寞半城夜火  
參差

夜坐偶感

正三更打徧小簾外雪花飛有魏博監奴天雄內宅  
袴褶黃皮傲傲釀錢會食爇兩行紅燭霧成圍銀甲  
崩騰碎摘玉船狼籍爭揮 依稀啁哳更喧 唇話諱  
旋翻該笑賀公吳語參軍蠻語相視然疑吳姬吟鶯

叫燕記綠窗細效抵游絲惆悵新眠難穩淒涼舊夢  
都非

過故友周文夏園亭

東風昏似夢又吹我此間行算有限歡娛無多光景  
也費經營當初笑呼猿鶴待功成綠野始尋盟空却  
池塘睡鴨留些欄檻穿鶯 盈盈殘月不勝情依舊  
下簾旌歎堤楊尚短林花未滿舞館先傾清明滿園  
蝴蝶只和烟帶雨舞迴汀黃雪廊邊舊事水明樓畔  
前生

新霽過蝶庵訪雲臣不遇詞以柬之

杏花村賣酒風弄處一旗偏且側帽微吟閒攜步履  
來趁斜川風前暗添語笑儘閒坊小曲總暄妍擬作  
鶴窺籬外暫勾蝶出花間 闌干柳絮滾香綿吹向  
綉簾邊奈綠窗倚徧鑪薰闋若茗椀依然吟鞭知他  
甚處料狂僧小史與流連鬪葉定迷深巷衝歌准上  
游船

戊午中秋同旣庭賦昨歲中秋與旣庭同在

玉峯三友園

舉觴浮皓魄何故向客中圓只斫月吳剛登樓王粲  
一樣難眠長安金波萬頃儘六宮三市浸其間天上  
桂輪晶餅人間玉臂雲鬟 年前曾在馬鞍山半醉  
恰憑欄對丹崖翠瀑狂歌曼嘯漏盡纔還誰憐萍蹤  
無定又天街攜手共君看今夜鳳城雙闕素娥分外  
嬋娟

翠樓吟

席上贈伎時伎三日後卽落樂籍

銀甲捱纂珠條絡鼓清歌屈柘如縷人到離筵裏儘  
眉黛愁將碧聚縱橫玉筍似綠柳縈烟紅蘭着露欹  
鴈柱一場春夢沒些情緒 他日縱過侯門只光延  
坊畔櫻桃一樹奈銅輿催上更糝遍一街絲雨橫波  
重注看斜側帽簷銷魂無語紅燭底新官舊主一般  
胡覷

惠山雲起樓作

萬斛空青一天冷翠和晴飛上簾押老松三百本山

雨響偏張鱗甲崖傾峯沓有客註茶經僧編梵夾泉  
鳴邑恰逢深深確樵吟相答 晚值蟾影初昇似姮娥  
粧鏡夜深離匣碧雲千萬頃被一點玉纖偷搯月明  
三匝謝鶴許攜瓢猿呼荷鍤為盟敵他年傍此竹弓  
射鴨

三月十五日虎丘卽景

桃花水絳卵色天青早烟着人如醉風光日夜換換  
不了吳宮羅綺千年霸氣只鶯囀山房鴉啼水寺當  
年事斷崖老樹依稀能記 冶麗簇隊成團有釵蟲  
落磴裙梅飄砌劍池苔蘚黑越顯得明粧絕世佛前  
私誓怕亂水東流夕陽西逝憑闌望五湖晴爽碧空  
無際

小院

小院蟲蟲斜橋燕燕悵悵觸起閒事當初粧閣影亂  
織在濛濛秋水餅金曾費只趁月藏鈎隔花傳謎依  
稀記遞香窗眼浸嬌杯底 顛顛此日重來剩榆莢  
漫天苔錢鋪地心情何處寫擬寫上繚綾帕子研來

鬆膩怕未便緘愁還難盛淚斜行字沉吟劃滿竹肌  
空翠

曲游春

花朝

穠春無限好正雲剪春羅水鋪明鏡滿目紅芳記淡  
烟斜日江南時景紅板橋西路有萬縷綠楊拖徑更  
憐次第風光巧鬪吳娘花勝 回首夭桃露井憶檀  
板銀罌那時俚並人在花朝有嬋娟姿格玲瓏情性  
自後堂分袂長則是如醒似病可惜憔悴蘭成淒涼  
家令

上巳修承招同諸子修禊

昨夜風吹雨恰晴光早繡正好修禊弄碧垂楊倚斜  
橋招手邀人水戲洛浦風光麗况滿座安期千里一  
樽故國心情三月麗人天氣 小苑露桃開未正紅  
萼猶含枝上輕綴幾度花前趁閒身正健祇須沉醉  
莫管金鞭墜酪酏也斜陽歸騎尚遇無數羅裙盈盈  
挑薺

映山紅慢

竹菇用湘瑟詞詠石榴韻

三月廚娘乍權就桃花苦醋恰園後籬邊幾叢新長  
臙脂三五相娥竹下啼猩雨灑鶻痕映空山暮算風  
味世上侯鯖禁巒應妬 山館下極望嫣然早已向  
幽窗催句正此際太常齋日小摘珊瑚一樹浣餘還  
怕芳香損倩筠籃把紅鮮護傍闌干住誤飛下銜花  
燕羽

看花迴

南嶽寺大悲閣上看玉蘭花用清真詞韻

春山淡冶如笑風光鮮潔梵閣斜盤碧磴恰千點瓊  
葩瓏瓏纔結花明玉淨小鬪山窗鶯語滑憐少室珠  
樹輕分天花無着姿清絕 想只有山間白月還記  
省鬢陀根節誰伴深林清苦只幽澗蘭心亂崖石髮  
孤情絕照古寺誰曾經浪折半簷花千嶂瀑看煞難  
分別

月當廳

虎丘中秋東蘧庵先生用梅溪詞韻先生時

寓臯橋

碧海此夜冰輪滿龍堂老鐵吹裂波心斜倚廣寒一  
望兔窟清深照徹吳王宮殿徧臨街簾子漾綃金更  
多少伎船燈火水寺謳吟 茶鐺正穩臯橋畔好風  
光摘船試約閒尋月底半塘譁笑百沸潮音檀板競  
從石場鬪桂花都上帽簷簪如覓我聽歌處在斟酌  
橋陰

桂枝香

甲寅中秋

霜簷如洗有碧落冰輪今夜飛墜月海霓裳殘拍淒  
涼猶記素娥休向吳宮照有多年雕闌錦砌金波萬  
頃細看來是倚欄人淚 算世上雲鬢玉臂和老去  
英雄一般憔悴落葉啼螿只是夜長難睡銀壺擬泝  
孤光倒奈沉沉悶懷先醉水明樓畔西風江上有賓  
鴻唳

石亭探桂和竹逸韻



晴秋摘黛肯閑置車中學婦人態南郭先生約我畫  
溪擊汰石亭老桂槎枒甚續前游何妨今再霜篷汎  
酒僧盧鬪茗談禪說怪時有談鬼伯娶婦事 漸石  
壁斜翻暮靄照亂榭叢篁蘚痕纏薑忽放狂顛老子  
生平無賴西風斂却英雄手只頻年持螯劈蟹城陰  
歸晚續紛金粟帽簷齊戴

蟹

萋蒿淺渚有郭索爬沙攪亂村杵溪籩霜紅織滿夕  
陽鴉渡漁人拂曉提筐喚小門邊陡驚羈旅羹材誰  
算子魚通印河鮑雪乳 記昨歲秋窗鳴雨見小插  
黃花濕蟬拖處笑說螯肥雙陸桂堂曾賭玉纖簾底  
須親擘況西風釀寒如許沉吟此事何時還又暗聽  
街鼓

玲瓏四犯

月下聞笛

三五良宵看雲月澄鮮幽輝盈抱羈旅無眠愁思幾  
番縈繞滿園春水空濛映翠竹枝枝斜裊恰嘹唳誰

家入破遙想小樓空悄 因思天寶梨園隊有金鴈  
鈿蟬絕妙更偷把寧王玉笛吹徹誰知道一自華清  
人散繚垣外閒花野草歎此生頭白天涯再聽伊涼  
別調

人日前一日雪中用梅溪詞韻

勝裏春人和天上瓊葩今夜雙剪糝粉飄綿舞困乍  
颺仍捲低處纔滿銀塘旋又上鳳樓堆徧問曉來還  
積多少定沒小窗雙扇 柳花尚早梨花未訝濛濛  
恁時相見拚將冷淡疎狂任性行盡天涯遠祇怕火樹  
漸紅燈市上翠愁珠怨料六花情重留些三元夜印弓  
痕淺

苦雨同雲臣用梅溪詞韻

屈注銀潢問天畔河流還剩多少風雨爭馳鐵騎金  
戈齊到只有幾疊屏風上畫着吳天晴曉數年光銷  
沉何處都付汀烟水草 今年紈扇淒涼甚未西風  
早辭懷抱簷端漫訝紅輪吐却是榴花照無數詞客  
城南久冷落酒壚歡笑怪天公也學銅仙流淚向宮

門道

大江乘

聞鴈

金風凜凜將冷鴈糝下半年天煩惱攔逐征南諸將帥  
飛透黃榆白草萬里邊愁一行兵氣辛苦憑誰道過  
雲裂石數聲橫度林表我且緩把一樽水明樓畔  
側聽心如擣響帶秋砧偏覺慘更犯幾般曲調南浦  
烟深後湖陰重月挂關門小不如北去怕蘇卿雪窖  
將老

霓裳中序第一

詠水仙花次尹梅津詠茉莉韻

珠櫛寒粉鬢偎罷銀篝紅獸熱恰值青霜騷屑有一  
種瑤芳白花翠葉海天皓月羨玉娥生長綃闕斜春  
渚竟川含綠一笑嫣然絕妙絕頓成離別長則伴  
兒家粧篋有時墜落簾箔看盡人間多少蜂蝶五銖  
寒到骨悵千里洞庭飛雪傷情也舊家何處悄對素  
梅說

憶舊游

寄嘉禾俞右吉朱子葆子蓉

松陵東去路記水程烟驛幾多般鴛鴦湖裏泊重城  
燈火一派潺湲船樓玉人行酒碧浪瀉紅顏更冪歷  
丹鱗綿濛黛甲上下哀湍十年成間別想怪侶狂  
朋一樣啼斑縱玉清歸去怕滿天風露猶憶人間只  
是南湖柳色憔悴不堪攀長望語兒亭故人爲我且  
加餐

湖海樓詞集卷二十



湖海樓詞集卷二十一

宜興陳維崧其年著

秀水高佑鈺念祖

石門勞之辨書升

太倉王 揆 穎庵 選

南海梁佩蘭藥亭

水龍吟

江行望秣陵作

輕舟夜剪秋江西風鱗甲生江面瓦官閣下方山亭  
外驚濤雪片一帶蔣州千尋鐵鎖等閒燒斷只波間  
皓月流光欲下舊曾照金陵縣 何處迴颿搗鼓更  
玉笛數聲哀怨回思舊事永嘉南渡流人何限如此  
江山幾人憐惜斜陽斷岸正江南烟水濛濛飛盡楚  
天新鴈

己酉元夕洛陽署寓對雪

一番宛維元宵紅燈閃得人心碎孤身一箇悶懷萬  
種故鄉千里舊恨淒然春陰攙亂漫天攪地想當初

此夜風前酒後有多少輕狂意  
記起閒遊舊事小  
門邊那家殊麗星橋將斂香車乍碾相逢橋背近日  
飄零半生流落料伊知未伴銅駝撲着街頭殘雪冷  
清清睡

春夜聽隣閨擊鼓

玉羅窗亞紅牆飄來腰鼓黃昏鬧騰騰紉紉慢如琢  
玉驟如懸瀑紅漆槌兒銀塗架子簾東斜靠落燈風  
幾陣催人揜袂琅然響釵應掉  
漸覺點聲稀處小  
樓前雨聲隨到擊損鼉皮敲鬆犀釘將愁都攪滿耳  
箏琶花奴何在記他天寶倩隣娃暫歇揜過待我作  
漁陽操

詠杜鵑花

小樓日日輕陰花枝映得紗窗曙恰推窗看玉欄干  
外紅香無數櫻筍時光鞦韆院落襯他嬌嫋只一枝  
怯雨泫然却想故鄉也知何處  
自別西川萬里擬  
消受江南歌舞詎料年年每當開日便成春暮甚日  
重逢錦城絲管華陽士女待化爲蜀魄枝頭喚道不

如歸去

詠繡球花

洞天雲海沉沉瓊屏小闌銀球墜亂拋下界細粘枝  
上輕颺斜綵刀剪無聲裁縫滅跡粉搓雪膩笑牆頭  
柳絮成團打塊學嬌樣終難似 誰把一規圓月破  
工夫玲瓏劃碎玉欄干外映來一色亭亭常在絕代  
璠姿明粧自好胭脂都退被佳人折下紅尖戲蹴向  
鞦韆背

城上看桃花

花光撲上春城曛曛直把人衣染家家百舌年年三  
月桃花滿店誰釀梨雲更攙柳浪倍添伊艷算那家  
映水開偏好胭脂一院門長掩 城下綠蕪如毯不  
禁風酒旗輕颺也應明日再來尋處落紅萬點囑付  
花鈴忍令一片頓隨春滅恰牆頭幾朵含情送客暗  
頽嬌臉

送春和雲臣韻

春光不像曾來如何又說春將去一尊別酒兩行情



淚淒然無語恰似明妃紅顏遠嫁玉關難駐歎今年  
烽火連天戰鼓都攔截春歸路偏是魂銷此際怕  
天涯少人憐處臨歧低囑縱然去也休忘尺素忍見  
愁紅將飛更怯乍颺旋住想溪橋來夜飄零有恨與  
何人訴

巷口見磨鏡者

琅然者是何聲因風飄入深閨底蝶蜂引處賣花聲  
亂倍添嬌脆翥地誰家獸環小響輕搖梳子見一雙  
小玉盤龍暗捧和羞映中門裏出匣一輪新水要  
秋宵涼蟾鬪美紅綿揩罷撲將紫粉洗他空翠此際  
菱花宛如月樣佳人心喜只晚粧攏鬢無端忽憶嫁  
時情事

秋日過飲蝶庵紀坐上人語

萬家砧杵秋城重來何處尋門巷三年一別孤身作  
客蠻江烟浪綠幘榕城金尊荔浦慣陪牙將自連天  
烽火舞衫換了亟爲買歸吳榜屈指當年傳侶舊  
梨園蜂惆蝶悵或伴侯王或成駟僮或淪廝養縱剩

柔條也應不似灞橋模樣趁啼鳥乍歇霜天漸曉撥  
箏琶唱

秋城看西溪戰艦水閣

豁然老眼新晴戍樓下俯秋江遠巖關金鼓西風彩  
幟盈川鵝鸛狎水黃頭凌風畫鷁銀濤怒捲笑喧鬪  
錯認龍舟蓮舸惹士女傾城看 瀟碧微涵鏡面有  
周侯廟臨溪岸亂離重遇英雄何在登城長歎昔日  
波平今朝浪駭魚龍蒸變漸日斜人靜盈盈蘋蓼弄  
陂塘晚

秋感

夜來幾陣西風匆匆偷換人間世淒涼不爲秦宮漢  
殿被伊吹碎祇恨人生些些往事也成流水想桃花  
露井桐英永巷青驄馬曾經繫 光景如新宛記記  
相逢瑤臺殊麗微烟淡月回廊複館許多情事今日  
重游野花亂蝶迷濛而已願天公還我那年一帶玉  
樓銀砌

送梁溪明府吳伯成先生新任閩中臬憲

無諸城已銷烽鷓鴣雙引熊幡舞鮫宮浪偃鯉湖波  
靜歡騰榕浦荔子搖丹石華漲綠海雲佳處仗九龍  
仙令二泉茂宰洗兵馬爲霖雨 只我離情萬縷逐  
盈城攀轅士女摩空瘦鶻倚牆病驥飄零誰訴落落  
彌衡茫茫劉表此身無主送千秋鮑叔紅旗掣電向  
閩天去

壽尤悔庵六十用辛稼軒壽韓南澗原韻

曾經天語憐才如今老却凌雲手開元鶴髮茂陵鉛  
淚海天非舊長樂笙簫連昌花竹可堪回首算軟裘  
快馬呼鷹緜犬當時事還能否 摘盡瑤臺星斗水  
哉軒夜明如晝離騷一曲清平三調小盤珠走漢殿  
唐宮能消幾度花陰杯酒鬧箏琶腰鼓紅櫻紫筍上  
先生壽

壽朱致一五十再用前韻

花前日飲亡何何須暫住捱纂手蓮凋華頂桑栽蓬  
島月明如舊歷歷神州茫茫知己幾場搔首問王家  
阿黑桓家靈寶今尚有其人否 金印由他如斗且

逍遙藥欄紅書莫愁螻伏只須龍臥任呼牛走撥觸  
雄心半牀冷劍千杯熱酒喚堯年老鶴秦時毛女捧  
卮來壽

壽黃珍百七十仍用前韻

楚天解組歸來顛狂肯放杯辭手黃鷄一曲千場保  
社百年親舊起舞婆娑好風吹帽野花簪首試酒酣  
重問渚宮烟景仍髣髴從前否君說崖欹峽斗亂  
猿啼絕無昏昏書岳陽樓閣洞庭波浪銀飛雪走一笑  
浮生杜陵花鳥信陵醇酒向彭錢驕語爾曹還總讓  
才人壽

上觀察金長真先生

當時懸瓠城頭經過已切登龍願一星忽到三吳重  
地藉公司憲建業旌幢廣陵笳鼓歡聲騰徧更庾樓  
鄭驛錦袍銀燭高會盡東南彥伏謁敢辭疎賤况  
盈盈鄂君舟便時同健庵學士渡江亂帆吼雨西風  
跋浪珠飛雪濺聞說平山歐陽舊蹟畫堂重建願從  
公之後闌干醉拍眺秋江遠

乙卯暮春雲臣齋頭看牡丹

一年一度花前舊年笑語鶯猶記今年倍好纔開便  
遇養花天氣料理銀罌排當檀板綠窗如水喚游絲  
舞絮遮圍繡幙休輕放閒愁至多少倚闌心事悵  
神州斜陽戰壘沉香亭畔慈恩寺後靡蕪滿地只有  
江南一枝如故紅酥粉膩任英雄老了花還賺我且  
逢花醉

送蔣慎齋憲副視學江右

一川紅藕花開樓船西上潯陽去江涵翠榜風吹絳  
帳玲瓏無暑鹿洞儒生江州僚佐歡迎溢浦料匡廬  
九疊凝粧染黛向鷓首競縈舞漫說關山金鼓奏  
笳簫中流容與滕王閣在琵琶亭好緬焉懷古亂日  
才多兵間士賤青衫失路仗先生獨挂一輪冰鏡作  
斯文主

安慶龍二爲舍人光能知夙生事自言蓋凌

波池中老龍也魂夢往來時常髣髴又言  
生平每當淒風碎雨則奮躍欲狂一遇晴

霽則吻燥神枯怏怏不樂睦州方進士某  
爲作傳傳最詳凌波池在西京終南山下  
三生石上精靈依稀認得重來路終南山下凌波池  
畔紅泉綠樹水國前緣綃宮閒話冷風酸雨記耕烟  
跋浪揚鬢濺沫夜碧落朝懸圃 一自甘泉獻賦謫  
紅塵此間殊誤鐵笛滄洲驪珠樓館幾回驚寤太液  
鯨紅玉河蜃黑舊游何處正霜天萬斛西風隱隱有  
銀濤怒

白蓮

水明樓下相看涼荷一色瓏鬆地赤欄低壓綠裳輕  
蘸月明千里小苑梨花重門柳絮算來相似傍前汀  
白鷺幾番飛下尋不見迷花底 無數弄珠人戲小  
酥娘水天閒倚明粧束素非關只愛把穠華洗爲怕  
秋來滿湖紅粉惹人憔悴拚年年玉貌江潭夜悄凝  
去聲如鉛淚

春游卽目賦得侍兒堪感路旁人

花間一輛雕輪繡緯裊盡東風細龍旛壓角翠釵盞

葉流蘇百琲暗想其中宮黃蕃錦不過端麗縱玉環  
豐豔金堂嬌貴瑤池侶休凝睇 忽見花枝徙倚是  
誰家穿簾燕子忍當春冷拋他慢後坐他車尾彩筆  
飄蓬青衣淪賤古來如此料歸時淺導銀燈轉那箇  
屏風底

慶春宮

秋曉

杳杳秋紅濛濛夜碧戍樓乍歇疎更宿鳥啁啾遠鷄  
咿啞野烟繚繞初生水明燭暗聽天外南來鴈聲夢  
迴酒醒人倚高樓月在前楹 初暘澄澹堪驚纜漾  
庭柯旋映簾旌楓柏山林尊鱸水郭家家軒檻新晴  
五湖堪長總莫管天涯戰爭數村橫笛一片西風十  
載浮名

氏州第一

秋日懷東臯諸子用周美成韻

千片芰荷零亂簾捲西風人倚樓小橫竹泠泠峭風  
歷歷一碧遠天縹緲非淡非濃颭水國村村斜照中

酒心情欲寒天氣暗催人老  
三十六鱗江上少奈  
無限舊愁繚繞沙鳥將雛江鳧傍母秋水柴門抱正  
搓橙時候也題糕近龍山歡笑寫盡吳牋盼晴空翠  
屏都曉

詰鼠戲同雲臣作

秋夜燈青窳窳作響先生拔劍而怒鼠輩來前復何  
敢爾爾罪誠難悉數蛇蝮猶堪耐不耐汝曹偃僂每  
到更深觸翻杯瀝動搖屏柱  
書籍縱橫遭點污擗  
搯到五車六庫穴內乘車蜜中漬矢變幻難憑據飲  
河歸休浪喜高堂下獄詞先具速付歐刀便豳風也  
思熏汝

鼠對

帶月啼梁乘夜發屋戴頭人立而語顧謂主人憎予  
太甚芥蒂寧因細故窶藪無長物幸託均堂沮洳昔  
在倉中李斯丞相記曾相慕  
今日深文何太苦笑  
作事乃公殊誤俠不屠龍仙難控鶴僅磔張湯鼠安  
能久居鬱鬱化青蝠凌空飛去古洞長松有甍龕是



吾伴侶

拜星月慢

余不到玉峯三十餘年矣乙卯清明與植齋  
竹逸重游是間賦詞感舊

花朵擎來柳絲飄到一陣卓金車子百五韶光襯賣  
錫天氣半山上下多少蒼松翠檟掩映舞裙歌袂紺岫  
頰崖有從風羅綺 捫頰巒劃損苔成字忽暗省三  
十年前事幾徧側帽思量記不全頭尾怪天桃仍舊  
紅如此劉郎鬢不禁星星矣問今夜細雨棠梨肯替  
人愁未

花犯又一體

詠鄆陵蠟梅花并寄梁曰緝侍御

一枝枝未曾經謝黃時早如子霜簾捲處較金縷衣  
痕多些香味面面聖檀風外綴萼蹙微籠紫似昨夜  
侯門燭滅銅盤堆蠟淚 傳聞鄆陵戰場多問花何  
偏傍荒城廢壘拈花嗅形容遍幾番不似多分安陵  
年少客半醉後金丸拋葉裏想天上故人鄉夢惺惺

長記此

詠竹逸宅內薔薇

弄晴天紅薔十丈盈盈媚初夏鬧花小架恰倒影迴  
塘綠水如畫柔條亂舞銀牆罅胭脂千斛瀉籠綉榻  
低枝近手偏將鴛袂惹 老松拏雲吼濤聲繁英爭  
蔓引松身都化似天半作勢處燭龍將下看灼灼猩  
肌萬點照十二樓前渾不夜還則慮晚來風雨紅顏  
偏早嫁

同雲臣暨南水上人過竹逸齋看芍藥

看君家崢泓蕭瑟門庭寂如水雜花鋪綴任紫艷紅  
英圍繞籬次年年步履隨蜂至許多花下事算只有  
風前鈴索知人吟賞意 今年東吳到詩僧相逢何  
况又落花天氣禪板靜相將鬪賦才清綺誰知道百  
花謝後還領畧粉香新月底凝望久爲伊凭爇闌干  
紅梵字

西山晴雪

徧歎崑崙瓏晃耀瑤簪插千點六花飄颻照綺旭温

磨光彩逾漱遙憐獨騎迷山店禪扉又早掩再好問  
何村賒酒吟情遮莫減誰工畫圖論人間除非倩  
妙手迂倪寬范潭柘寺雀兒寺粉裝銀蘸羣峯只東  
偏消早依舊吐一枝青齒蒼憑欄望吾狂甚矣笛聲  
吹阿濫阿濫堆曲名倪迂范寬俱畫中高手

齊天樂 一名臺城路 又名如此江山

暮春風雨

小樓昨夜東風到吹落滿園空翠時有茶烟絕無人  
影好箇他鄉天氣淒涼欲死見燕剪平蕪柳拖春水  
暗省從前如塵似夢最難記當年曲院寒食錫香  
花更暖許多情事金斗猶溫玉釵還響已送愁人到  
此也思寬慰奈把酒聽歌幾番不是暮雨瀟瀟記吳  
娘曲子

驥沙旅店紀夢

坐來冷店思量遍昨夢太無頭緒燈影青熒被痕紅  
皺說也惹人悽楚迴腸千縷總些箇情懷舊時言語  
枕畔匆匆三更人到消魂處那人還未憔悴松兒

猶合數帕兒親與燕子惜惜柳花拍拍多分池臺易  
主黯然無語憶鏡裏朱顏簾前白紵一片空江響數  
聲疎雨

重游水繪園有感

園丁不認曾游客嗔人繞廊尋翫紅板橋傾綠楊樓  
閑譜出荒寒一段看棋柯爛算往事星星酒旗歌館  
深悔重來不來也省鬢毛換風前又成浩歎說此  
間蘿屋有人羈絆恨極賣珠緣慳搗藥贏得啼鶻頻  
喚扁舟故國只皓月魂歸清江目斷今古劫灰付日  
斜人散吳門吳蓋仙曾客此園歸死梁溪故後段及  
之

端午陰雨和雲臣用片玉詞韻

紅榴淚斲蘇蘇雨正因此時重五怨結湘纍悲纏騷  
客天也爲人酸楚孤城蝦虎吾邑名蝦虎城颺幾陣  
茶烟一絲鬢縷觸緒沉吟蒲樽嬾賞小晡午江南  
江北行徧每逢看競渡傷今弔古俛仰隨人飄蓬返  
里蠹盡彩箋新句流年空度記麝粉釵符舊關心處

鎮日空濛戍樓將動鼓

梅廬花下送潘原白之薊門友人之彭城

笛聲樓上飄來細又了一年梅事有客花前作裝縛  
袴遙羨五陵佳氣昭王養士築百尺金臺憑空飛起  
今日游燕問誰買駿有如此彭城有人並舸歎蕭  
條徐沛沙淘浪洗長短亭邊淺深杯送一樣故人千  
里清明上巳算總是來朝住爲佳耳欲浣離愁倩半  
江春水

早春壽魏塘柯素培先生

東風一夜漫天綠搓勻柳湖烟水幾樹橫斜萬株香  
雪絕稱小樓人倚梅花天氣正院貼宜春釵搖燕子  
纔過新年六街已鬧夜蛾未一輪卿月將滿戟門  
羣獻壽絲竹清脆綠蟻難乾碧桃旋放此曲飛瓊能  
記萱闈日麗况膝下綵毫承恩天際簫鼓聲中泥金  
齊送喜

立春日東高謾園時謾園新納姬

御溝流水依然凍東風已窺窗眼非摘新烟餅堆弱

絮縱有咬春誰薦沉思故苑正萬點橫斜半篙清淺  
玉臂今宵料他雙勝也慵剪長安多少羈客除非  
高渤海此恨差免喚馬簾間鬧蛾橋上夜景有人拘  
管俊游灞澹趁微雪金門早鶯珠館待去朝天翠衾  
新賸嬾

蟬

高柯一碧無情極誰遞晚來秋信鴈塞琵琶鳳城砧  
杵髣髴一般音韻悠揚不盡待隔水聽來數聲偏俊  
譜入哀絲螳螂捕處倍淒緊玉盤金掌雖好餐霞  
還歎露此事難準帽插豐貂機鳴素縠幾度愁他相  
溷悄然低問可仍記當初衛娘低髻仙蛻寧遙料丹  
霄有分

題松萱圖爲姜西溟母夫人壽

憑誰細研吳綾滑貞松皴來蒼昏鬣可拏雲濤偏沸  
雨只伴疎梅衣縞霜零雪嬾兒著得書成龍鱗暗老  
十載飄蓬枝頭飛去翠禽小鄉關悄然回首小橋  
新月下茅屋偏好肱被輕分江魚遠致長祝歲寒相

保清愁未了再添筆紅萱欄邊斜裊擬答春暉此心  
慚寸草

遼后粧樓

洗粧樓下傷情路西風又吹人到一綰山鬟半梳苔  
髮想像新興鬧掃塔鈴聲悄說不盡當年花明月曉  
人在天邊軸簾遙閃閃苦釵小如今頓成往事回心  
深院裏也長秋草上苑雲房官家水殿慣是蕭娘易  
老紅顏懊惱與建業蕭家一般殘照惹甚閒愁且歸  
斟翠醪

綠水亭觀荷

分明一幅江南景恰是鳳城深處野翠羅羅嫩晴歷  
歷撲到空香萬縷早村人語是柳下溝塍籬邊兒女  
稻葉菱絲隔紗長作打窗雨蓮房箭靫簇簇西洲  
都蓋滿睡鴨新乳碧螿迴廊黃泥小竈幾斛冷泉親  
煮倚闌凝佇記罨畫東頭舊尋詩路招箇烟檣飄儂  
溪畔去

楓橋夜泊用湘瑟詞楓溪原韻

楓橋漁火星星處鐘聲客航仍度微昏簾幙乍暝帆  
檣夾岸多於津樹船娘吳語爲蘸水拖烟脆來如許  
不管人愁棹歌杳靄掠波去如眉月稜半吐想當  
年曾鬪館娃嬌媼夜市聽鶯春衣撲蝶夢到將圓頻  
誤鳴珂舊路問冶葉倡條可能如故撩亂心情化茶  
烟一縷

畫錦堂

述懷和蘧庵先生韻

我所思兮旁無人者長嘯離墨之陽時復讀書萬卷  
縱博千場悲來直攜橫槊舞舞興來還取素琴張誰相  
識只有當年郭翁伯邳君章石梁瀑布下神仙窟  
中饒鴈鶩餘糧我願結廬註易梯几焚香身騎白鶴  
朝蓬苑手斟丹液煉飛光沉吟久此意茫然未遂斜  
日徒黃

清明後一日同緯雲重上玉峯積陰乍霽春

女甚盛詞以紀游

昨日濃陰今朝新霽戲鼓歌扇相宜一路花搖綺憶



草暗金羈空園鞦韆猶未拆小樓香粉已全施春山  
畔遶澗縈巖頓添無數釵笄離離城上寺牆外店  
和烟着水參差翻借通明簾子映出纖肌堤邊絲柳  
飄成夢橋頭新月鑒於眉無情緒獨對裙邊蝴蝶細  
語移時

石州慢

憶舊用高季迪韻

醉拍雕闌思憶從前淚珠頻灑東陳倦沈多愁多病  
瘦軀堪把水市津樓奈他綉被濃香舊時閑事偏縈  
惹顛倒覓烏絲檢霜毫細寫妖冶此夜蟲蟲曾囁  
監奴葳蕤慢下且趁湘簾銀燈邀人白打摘盡銅籤  
小婢故惱人行任他嘶斷門前馬懊惱後堂前又年  
光換也

夏閏

竹院臨池蕉軒翳日蕭然烟幌送春留病賒秋做惱  
懶梳蟬樣灑灑永晝誰令幽夢驚迴偏嫌多事茶爐  
響侍女秉齊紈隔紗幮低蕩來往一湖水氣滿院

蘭風撲歸裙上悄覺涼釵委枕簟紋鋪浪起來慵綉  
將泉戲瀉團荷憐他葉嫩纔如掌珠滑不成圓却添  
入閒想

題家別駕亦人孝感冊并感舊游次蘧庵先

生韻

昨客睢陽古寺開元水木妍雅我方避暑兄過挈榼  
一樽同把詎知別後使君風木銜悽書來雙袖鮫珠  
惹擬補白華詩倩廣微烘寫 難畫纏綿至性恨抵  
啼猿感深封鮓太息鯉湖鴈杳遼城鶴化飯僧香積  
啁啾百鳥悲鳴靈旗恂况尻爲馬盛事徧流傳得之  
余季也子萬四弟自宋來宜述之甚詳

冬日舟過亳村舊居有感

黃葉村中綠水灣頭帆影零亂小橋夾浦依稀認有  
舊時庭院小樓還在記得人在樓中而今凝望如天  
遠烟裏歇吳舫似迷巢林燕 淒戀閒敲畫榜遙指

紅牆百端思徧可惜滿園榭葉半河菱蔓負暄鄰叟  
兩兩私語茅簷料他也爲王孫歎搖搖櫓過前汀驚水

禽飛散

南浦

泊舟江口

吳檣晚眺看隔江螺髻碧離離龍虎銷沉無據往事  
不勝悲憶昔曹公飲馬對江流橫槊賦新詩羨三吳  
人物伯符公瑾年少更雄姿 今古茫茫天塹捲神  
鴉日暮舞空祠多少南朝事業斷岸蠹殘碑月白估  
船銅斗唱西風雲水正瀾瀾歎多愁洗馬銷魂偏在  
渡江時

秋景

戍樓孤眺莽秋雲一片畫難成烟驛蕭蕭易響錯認  
是風聲却被沈寥商氣刮一天疎葉舞空城歎釣臺  
水榭千年剩址菱蔓繞湖生 極望溪山明瑟向楓  
汀茶庵眼偏明聞道樓船下瀨十萬水犀橫寄語魚  
龍休夜嘯海門月上定潮平對碧梧紅蓼暮烟殘照  
不勝情

宴清都

詠楊妃山茶花 在古香庵樓下

幾朵僧房吐東風裏胭脂淺淡偷注空王齋院艷陽  
天氣紅香盈樹隣娃漫鬪輕盈儘玉茗明粧縞素總  
輸伊睡足春酥臉潮分外嬌嫋 憑闌小字輕呼花  
如解恨暗垂紅筋依稀記得寧王玉笛花奴羯鼓古  
佛堂西弄影悵舊日花容何處又夜來細雨霖鈴黯  
然無語

曝日

雪後同雲盡遙村外早霞一縷紅暈柴扉纔啓晨曦  
初赫凍消霜畛結茆恰傍陽坡喜黄土泥牆簇緊有  
三兩溪友山翁窄籬矮屋隣近 閒邀趁燠迎暗藜  
羹乍糝濁酒新醞沙融澗煖情親話軟無愁無悶路  
旁多少行客笑馬首冰花膠髻總不如負旭南榮風  
光較穩

倒犯

秋日雲臣齋頭同大士展故友蔣瞻武遺墨

感賦

觸眼見官奴數行  
韭花遺蹟零紈碎  
墨秋光映碧天  
如拭爐熏茗椀幽  
卉疎花晴窗側  
盥手驗裝潢  
梯几看波磔  
惋斯人頓成昔  
深悔舊時賞  
慣鵝羣何曾  
知護惜  
記半醉寫徧舞鬢  
怕江樓壁渴驥勢  
掀騰極  
幾何時  
隣家吹夜笛  
總香粉猶存  
不受蝸涎蝕  
應遭  
蛛網織

莊椿歲

賀新城王太翁七十阮亭先生尊人

王喬家世神仙  
華顏那藉丹砂  
駐飄然鶴髮  
脩然鳩杖  
臨風揮塵  
恰值新晴  
算來秋到十分  
濃處看歷城  
雲物蜡湖烟水  
偏瀟灑  
真容與  
况有僧彌  
法護映  
庭堦  
琪花珠樹  
七葉貂蟬  
一門鸞鳳  
兩行鵷鷺  
最感  
深知綵絲  
欲綉黃金  
堪鑄羨爐香  
親染紫泥  
遙捧作  
斑斕舞

壽高陽李相國

千年仙李  
蟠根一枝種  
在沙堤  
右金波  
穆穆卿雲  
縵縵小春  
時候  
綠鬢調羹  
黑頭補袞  
人間台斗  
正宮門

絡繹駝封楮帕頻飛送神仙耐 更值梅前菊後喜  
堯天風光鋪繡君臣一德夔龍共事太平今又銅柱  
烟消玉關雪霽河山明秀願萬年曆上一年一度介  
先生壽

瑞鶴仙

上元和康伯可韻

昔遊思後苑記天上月圓人間月半六街笑聲滿看  
火蛾金繭春城飛遍琳宮瓊觀隨處掛鰲山燈爛最  
銷魂深巷殘更小顛門邊雙劍 休羨無多勝景有  
限芳辰不堪追玩紅篝熏煖和衣臥誰低喚怪流光  
一去鈿車羅帕吹煞東風不轉只玉梅梢上冰輪依  
然相見

鄒程邨母夫人壽

千金今夜直羨阿母白髮珠袍一色襦觴蓬閨側有  
南路豪家東朝貴客華鬪列戟向尊前筮篥醉擘倩  
何人笑問君家家本難忘易識 猶憶曾陪董相閒  
過鄒陽讀書騎射賢哉湛母截髭親爲置食看懷清

臺畔夫人城上無論功名赫奕只膝前有子談天生  
兒亦得

詠百舌鳥同雲臣賦

綠楊庭院悄正交網篩春綺窗弄曉紅蕤枕斜抱驀  
枝頭曉曉信風吹到如簧慢奏遞耳畔那人知道把  
舊愁向五更頭說箇綿蠻不了 裊裊咽時逾響溜  
處偏圓百般輕巧詎知衰髻貪散誕學莊老入春來  
猛被花枝招恨又被禽聲喚惱待來朝索性連他和  
花都拗

慈仁寺松

爾頭童齒豁又短如翁伯小踰臧紇年高尚存活換  
一番兵馬一番宮闕雷轟電掣早煨就秦銅漢鐵任  
噓歐萬怪挪揄閃爍百靈恫喝 奇崛種於奚代長  
自何朝忘他始未空餘獵碣略記汝生年月只新來  
廟市喧阗蹙蹙踏闌入市場豪猾趁天風鱗鬣狂拏舞  
場回鶻